

頤

綵

堂

文

集

頤絲堂文集卷十四

秀水 沈叔埏 埴爲

墓志銘

太子太傅刑部尚書晉贈太傅入祀賢良祠諡文端

香樹錢公墓志銘

代

宮傅大司寇嘉興錢公以

三朝舊德荷

聖主殊眷頤養林泉海內識與不識以山斗仰之以魯靈
光日之翕然無異辭乾隆甲午孟陬人日考終里第疏聞
上悼惜彌甚晉贈太傅入祀賢良祠賞藩庫銀千兩經紀

其喪

賜祭葬如制予謚文端令翰林院立傳飾終之典可謂備矣余爲公年家子曩自孝廉隨牒來京師辱公獎許殊特親爲評乙詞業暇輒指授詩學津梁不憚諄復示以奧窔通籍後復得追趨館閣垂二十年公顧余益厚而余親炙公之言論風旨者益深聞公之喪感憶平生知己悲從中來莫能自己旣爲位以哭適孤子汝誠等奉公治命屬誌塋石余何可以辭

按狀公諱陳羣字主敬號香樹裔出武肅王後明禮科給事中卹贈太常寺卿諱薇公六世祖也高祖諱與映曾祖

諱陞祖信安教諭諱瑞徵三世皆以名孝廉積學敦行著
於鄉考諱綸光太學生有詩名自曾祖以下並以公貴贈
如公官妣皆贈一品夫人公生二歲多疾疹鞠於外祖母
九歲始還所居邏村贈公隨侍信安學舍公方就傅家貧
母陳太夫人課讀於紡車旁太夫人故工六法藝林稱南
樓如史者也紡入僅供饘粥不足則鬻畫以繼公性穎敏
讀書輒能貫穿經籍下筆動與古會同里前輩中若羨門
竹垞一見並奇重焉未冠入都與諸老宿論文唱和砥礪
濯磨學識才品俱力爭上流於是名噪輦下人咸以公輔
器相期甲午舉京兆旋丁外艱辛丑登進士改庶常散館

授編修己酉典湖南試辛亥奉使赴陝宣諭化導事竣陞
贊善壬子陞庶子掌坊事尋陞侍讀學士充日講起居注
官乙卯

命視織輔學政兼

內廷行走

上登極之元年擢通政使司右通政丁內艱服闋仍

命視學辛酉陞太僕寺卿補詹事府詹事陞內閣學士兼
禮部侍郎逾月補刑部侍郎癸亥充補

經筵講官乙丑充會試副總裁兼署禮部侍郎丁卯庚午
兩典江西試壬申得疾歸公之厯官止此公於事持大體

守成法不以意爲更張而講畫事理洞達人情奉使宣諭
西秦所至輒與耕氓黎老敷揚

國家涵濡漸被之深仁導以敵愾同仇之志山谷野民咸
知感慕比還朝皆攀轅淚下至遮馬不能行公一生以造
就人材甄拔寒畯爲念故三任畿輔學政暨主鄉會試咸
稱得人而愛才下士之忱汲汲如恐不及若疏奏則有請
旌教子受封之節婦請停科試舉報優劣請頒從祀先賢
先儒姓氏位數請整飭尼山洙泗兩書院皆有裨化本又
如條陳耗羨事宜請修明思陵疏推原律意二疏載公集
中其有體要先後任秋官十有二年遇事虛衷商論盡言

無隱而不預設成見間有疑讞必剖析得其情用能仰佐
協中之化公之歸也邁反穀疾

上賜醫藥准假回籍調理

賜詩寵行公歸數年疾漸平會公子少司農汝誠繼起直
禁近有聲公亦不復有出山志而

上之所以眷公者愈篤丁丑

南巡賜鄉俸辛巳祝

釐進尚書銜

命與九老會遊香山繪圖

禁中壬午

南巡加刑部尚書乙酉

南巡晉太子太傅尋

命司農侍養於家辛卯恭祝

慈釐

命在紫禁城騎馬再與九老會繪圖禮成仍

賜詩寵行歸二年卒公爲詞苑舊臣初以文章受

憲皇帝特達之知遭際

文思天子復特邀優眷自林棲二十餘年以來以詩筒附
奏牋進

御之作不下千有餘篇

上覽輒稱善若鹿馴巖畔當童扶等句尤

嘉許不置至邀

天章俯和書賜者歲必疊拜千古賡颺之盛未有若斯之
隆者而公以樸誠上荷

主知深蒙

恩鑒見於

睿藻中許公爲頌不忘規凡數四嗚呼非公以有本之學
形爲有德之言烏能遭逢若是哉曩公在朝與休寧汪文
端名相埒公沒後

上駐蹕出盤閱公遊盤山詩冊有五首吟成錢與汪句感

舊眷懷同深太息及歸里日與長洲沈文憲齊名每

賜詩必並稱大老屢曰故人

上覽公遺疏詩以志惜有江南忽爾失二老天子原非友
匹夫何猶與文憲綴舉此皆儒臣不易遭之殊遇而生被
榮施沒膺茂典數十年如一日則公比於二公

恩禮尤渥云公天性孝友幼秉母教所繪夜紉授經圖自
識樂府得蒙

天筆賜題世傳其美色養太夫人備至以贈公不逮養終
身自奉儉約如寒素請馳封外王父母以報鞠育恩薦同
懷弟可縣令卒爲廉吏撫孤姪暨贅居弟媳推與獨厚雅

負人倫鑒成就戚族暨故人子爲多尤喜緩急人存恤甚衆里中賴以舉火者常數十家此在公爲小節要足爲世勸也迹公生平漢鄭均守善貞固黃髮不怠賜尚書祿終其身晉王祥以睢陵公就第公子肇爲給事中使常優游定省公晚年榮遇似之宋張洎博涉經史多知典故每上有著述洎必援引經傳以將順其意上賜詩褒美有翰老長儒臣句楊徽之能詩太宗嘗寫其警句於御屏上以備覽誦公應制似之至公所以深契

主知者則固有在宋仁宗讀歐陽文忠御閣諸帖篇篇有意歎曰舉筆不怠規真侍從之臣也神宗賜趙康靖詔曰

請老而去者皆以聲跡不至朝廷爲高惟卿有志愛君雖
退休山林未嘗一日忘也循誦數語豈非公之志哉若夫
康寧壽考似續蕃昌則尤文富諸老後所僅見嗚呼如公
者洵無忝完人已公生於康熙丙寅五月二十九日卒年
八十有九配俞夫人早卒

誥贈一品夫人繼俞夫人

誥封一品夫人前公九年卒將葬爲公預營壽藏子七人
長汝誠戶部左侍郎繼配俞夫人出次汝恭江南安慶同
知次汝懋塲沈宜人出次汝隨甘肅平羅縣丞次汝豐河
南中牟知縣次汝弼候補府經歷嗣公弟界爲後黃宜人

出次汝器

欽賜舉人曹孺人出女九人孫男十五人曾孫男二人以
本年十二月丁酉合葬於鹽官生坊之南化城銘曰

員海東抱牛斗躔孕靈毓秀祥禾興川公生上應文昌垣
穉而秀羸龜多文胚胎胎道懿與德淳發爲文章味義根執
謙持下困彌惇搏風遙翼翔鵷鸞筆兼燕許詞揚班善持
大體政不煩明刑一紀多平反

帝錫嘉詠于公門養疴得謝抽簪還

眷舊典隆憲乞言詩筒郵遞紛箋番

帝曰故人大老錢惟國之瑞模人倫臯颺益贊明良傳一

經接武光韋賢穀詒慶衍綿來昂居則長水寔武原威公德意銘公阡我儀圖之公長存

直隸總督贈太子太保入祀賢良祠諡清愨愚谷袁

公墓志銘

代

長山袁公之

簡任畿封也在己亥冬甫二載卽奉母呂太夫人譚扶櫬以歸歸未浹歲得失血疾尋奉

命偕勘伊家河工及疏洩濟寧以下積水

特旨起公再任直隸總督且有

恩命俾葬母事畢趣赴任蓋是時公疾少差持服未竟

上倚毘公甚故有斯

命洵異數已癸卯五月公疾益劇

奏請解任

上遣近臣往視疾疾竟不起疏

聞

上軫惜彌甚贈公太子太保入祀賢良祠

賜卹如制

予諡清愨飾終之典有加隆焉曩余以讞案奉

使還蜀公繼亦銜

命覆讞斯獄辱公與論相知之雅投分未幾會公莅任保

陽耳熟公治行合古有猷有爲有守益重公之爲人公旣
沒二子兵部郎中鎬工部郎中繼勤述公年譜涕泣請余
銘其塋石余奚忍辭

按譜公諱守侗字執冲號愚谷先世冀州棗強人

有明以棗強屬

真定今隸冀州

明初始遷祖諱彥忠貫長山代有隱德以耕讀世

其業曾祖諱雲蒸祖甘肅平慶道諱景芳考戶部郎中諱
承紱並以公貴贈光祿大夫戶部尚書妣皆贈封一品夫
人戶部公舉四子公居長次守仲甘肅河橋同知次守鈿
戶部員外郎並先公卒次守仰刑部郎中公五齡出就外
傳性尤穎異識者以器宇卜其遠大年十三負雋才未冠

補諸生再越歲以五經魁其鄉既兩試禮闈不售循例授
內閣中書舍人受知大學士傅文忠公選入軍機處遷內
閣侍讀文忠復奏調吏部掌選曹謝絕請託雖大寮不可
撓以私有所摘發不避嫌怨京察列一等再選江西道監
察御史辛巳秋出爲兩浙鹽驛道公任都轉二年悉裁陋
規雖經

奏明應得之款亦令貯庫充公旋擢廣西臬使遵外艱歸
服闋入

覲以母老懇畱京

上領之得

旨以三品京堂用仍在軍機章京上行走補太僕寺卿
特命兼吏部文選司事尋擢吏部右侍郎兼署工部右侍
郎調任刑部左侍郎兼署禮部右侍郎兼管順天府事務
暫署貴州巡撫丙申遷戶部尚書尋調刑部尚書公自庚
寅辛卯後無歲不秉使節嘗一歲屢銜
使命還

朝後再出出復以他事牽連更數省不遑啟居計奉
命治讞者凡十三他如酌議豐寧動支耗銀查勘金川軍
營運路盤驗甘省捐收監糧而經理朔南疏防者尤數數
最後偕大學士高文公堵築儀封十六堡漫口承

旨以實在情形入

告往來漫工畱豫河稍久尋授河東河道總督逾半載調直隸總督公之宣力如此迹公生平由掖省出莅外臺復由京卿出膺節鉞迴翔樞禁敷厯封疆以器識經猷荷聖主特達之知一時臺吏莫不心焉傾嚮奉以周旋是則是倣公任畿輔時

上嘗

賜詩有云貴重器資特簡諸及歿

諭旨有云端重厚實才守兼優此朝野所共知也顧余竊考公所以上結

主知者則尤在於守夫簠簋必飭脂膏不潤爲天子之守
臣此亦分內事耳然求其宦愈達守愈確往往難之我
朝綱紀肅清官方澄敘百餘年來廉吏之行事至今嘖嘖
猶在人口卽其姓名亦遂爲世所稱誦乃督撫中得謚清
者如趙清獻廷臣于清端成龍施清惠維翰徐清獻旭齡
傅清端臘塔殷清端泰楊清端宗仁白清獻清額袁清獻
懋功馬清恪祐金清惠世德格文清爾古德陳清恪詵陳
清端璣張清恪伯行倭數之僅十五人豈不難歟昔范滂
山郎論近代廉吏謂清矣而或短於才或餒於氣或不得
於君君子惜其用廉之未盡而公之才之遇則豈有是耶

余故揭公得諡爲清之難因并取前此數公之名綴書其間以備續廉吏傳之采輯且以爲世之爲清白吏者勸而畧其他善行之具於譜中者不更贅著明節以壹惠之義公卒以五月十六日距其生爲雍正癸卯十月二十三日得年六十有一配石夫人同邑福州知府諱曰琮曾孫女歲貢生諱予遵女繼王夫人新城刑部尚書王文簡曾孫女太學生諱兆野女子卽鎬繼勤嗣守鈿後孫男女各七人曾孫男女各二人娶嫁聘字皆士族鎬將以某年月日葬公於某原系之辭曰

般陽常白高傳天爲岱副岳峯縣連五公苗裔毓巨人奕

世載德長山袁清郎清卿紹厥先五經蚤擅無雙名

叶一

舉造翼登微垣入趨樞筦覘慎勤遴才省眼昇掌銓藤廳

相府聲蜚英

叶

轉離之江裕商民祥刑臬事陳粵西

叶奉

母一官乞

禁林

叶

仍典選牒伯罔遷內司喉舌參星辰外奉

尺一使節遄燕晉蜀浙黔與滇豫河宣防尤仔肩

帝簡宅牧首畿甸

叶

惟公公望才經綸奔歸子舍何樂樂

批勗守禮善養身願汝移孝爲良臣起公廬居公疾纏騎

箕遺去幕府捐蜜章

賜卹榮哀全尊名一字清尤難我究此義銘公阡清白吏

後宜子孫

戶部山西司員外郎守樸席君暨配蔣恭人墓志銘
歲甲辰七月農部常熟席君考終里第明年九月君配蔣
恭人以積哀成疾相繼卽世遺孤三人煢煢在疚余辱與
君交二十年君冢子主事世臣從余授經會余以省母假
旋先後赴唁越七年辛亥世臣卜宅於青浦金家橋火龍
灣之原先期謁余請志塋石余適喪偶忡惕不能綴文改
歲壬子葬有日矣世臣中前請益力余奚忍復辭

按狀君姓席氏諱紹容字敬堂號守樸其先河南人系出
唐禮部尚書襄陽縣子文公豫五傳至武衛上將軍諱溫

始遷吳洞庭東山二十九世明太僕寺少卿諱本楨爲君
高祖曾祖工部虞衡司主事諱啟寓再遷海虞遂著籍焉
祖中書科中書舍人諱前席師事當湖陸清獻公校刻遺
書以傳者也考兩浙鹽運分司諱襄妣顧太恭人爲秀野
先生女孫君生負穎質七齡就塾甫三載四子書五經俱
卒業操筆爲文有同宿學往往驚其師長方君考筮仕吾
浙君隨侍官廨過庭之暇兼命肄習當世之務文移簡尺
悉以委之君屬稿輒當意君從給諫張柳漁水部桑叟甫
兩先生游咸稱高足弟子自辛酉至丙子六踏省闈丁卯
已首薦卒以額溢見遺旣而君考罷官築別業曹溪移家

終焉君出入必侍色養承歡先意承志俾君考得遂初之
樂洎遭疾彌留君侍湯藥不脫冠帶者浹月及遭大故哀
毀踰節一切送往慎終必誠必信弗之有悔君既婁困舉
場落落無所遇因循例謁選人得戶部山西司員外郎故
事已選人員未經引

見仍準與春秋開試會有躁進者以蜚語相聞君倡同選
諸人不復與試浮議遂寢君既補官管戶部大學士長白
傅文忠公虞山蔣文恪公每諮以公事君裁決如流剖析
明當尋兼理浙江司篆堂司並倚重焉君念太恭人春秋
高未遂迎養請假南還上奉慈闈色笑務得歡心太恭人

性尤仁厚君仰體親心益爲惠於其鄉凡以匱乏告者雖
枝戚疏屬亦分橐俸之遇賺歲必減直平糶以廣賑賙其
他施藥物以起沉痾建橋梁以利徒涉里閭至今德之君
同懷惟女弟一人適翁氏相隔百里恐繫堂上心君爲就
近葺治田廬移傍所居歲時團聚太恭人顧而樂之君孝
友性成胥視此假歸八年而太恭人以壽終號痛哀慕僅
以骨立廬居三載得嗽上氣疾間一作勞嗽輒不止自是
無復用世志矣閉關却埽昕夕以圖籍自娛惟余輩二三
素心羣舟訪之相與談藝論文流連不忍別又十餘年君
竟以嗽疾沉綿不起配恭人蔣氏恩蔭主事諱淳女曾祖

河南提學道諱伊祖雲貴總督諱陳錫生於華閎幼承姆教於內則女誠諸書皆能通其大義年十七來歸時君考宦浙不以家累自隨恭人事威姑勦治家槩條理罔弗井如也迨後君官郎署太恭人憚遠未及從恭人畱奉晨昏以婦道兼子職居尊章之喪左右君哀禮交盡戚黨咸稱之君里居好施予以爲常恭人眈勉贊成數十年如一日君治家嚴肅教諸子以義方恭人以寬和劑之以慈懿佐之至勗以砥行立名未嘗少存姑息世臣充校館書畱京邸恭人於家問申致辭敦勉時以親益友遠燕朋爲諄諄撫遣出子女一如己出鳩鵲均平之愛樛木逮下之風恭

人洵無忝焉君壽六十生雍正三年六月十六日卒乾隆四十九年七月二十七日恭人壽五十有九生雍正五年十二月初九日卒乾隆五十年九月十七日窆以壬子十一月二十五日子男三長卽世臣

欽賜舉人候補主事恭人出次賡候選州同知世德俱副室出女四候選州同知嚴徵乾內閣中書舍人葉銓候選州同知王錫文周載基其壻也孫男七人女六人曩余諸生時館君第舍距舍數十武有園亭環植芙蕖花時移硯席池上余以淨植名之君嘗語余先世延陸當湖主其家與當湖之所以爲教者用相鏤礪余不敏所不敢少隳其

志以流於務華絕根者區區嚮往之誠竊冀不詭於當湖之教藉以踐君之言也嗚呼言猶在耳曾幾何時而君已不可作矣人琴之感其能已於懷哉銘曰

安定三遷荆豫吳二十九傳笠澤居散財助賑大厥家慶貽累葉聯簪裾君策高足郎署趨輔臣瑩拂流清譽陔蘭慕切返里閭求善不厭久乃孚高會之澤君載耨手挽澆俗還古初一經課子驥

皇途承

恩預窺秘閣儲哀纏風木親不畱相莊繼逝甲未周佳城同穴偕好仇故人執紼懷前修感君厚意銘斯邱詒爾子

穀兼孫謀更數十傳莫與儔

國子監博士充四庫全書總校官議敘主事茗花徐
君暨配汪朱兩恭人墓志銘

乾隆五十七年壬子孟陬中憲大夫主事茗花徐君考終
德清故第有子秉美不幸才而夭治命以從孫懋學爲之
後閔三載懋學服竟移居禾郡從予遊嘉慶二年丁巳嘉
平築宅於武康烏迴山之麓葬有日矣踵門請志君之塋
石授余以試事與君相遇於西泠寓齋聆君言論風旨歎
爲克紹厥家洎予官掖省奉派緬書中秘頻數過從蓋交
雖淡如而投分已三十年矣重以孤孫之請不得以不文

辭

按狀君姓徐氏諱以坤字穀函號根苑又號茗花始遷祖諱昂明嘉靖間自餘姚來卜居遂貫德清五傳至君高祖諱文貝以諸生好義遇歲祲走越中貸米千石航海歸給親黨多獲全濟事載邑乘曾祖諱倬康熙癸丑進士由編修歷官侍讀

聖祖南巡超授禮部侍郎祖諱元正康熙乙丑進士由編修歷官工部尚書三世並

贈封光祿大夫妣皆一品夫人考抑齋公諱志巖康熙癸巳

恩科副榜由寶應知縣歷官河南下北河同知以君官

晉贈中憲大夫妣楊恭人少保昭武將軍諡敏壯公女孫
君昆季六人長次並蚤世三諱以豐湖北武昌知府四諱
以震乾隆丁卯順天舉人歷官刑部郎中五諱以泰山西
陽曲知縣次卽君生而穎發五齡入家塾卽不好弄九歲
能屬文十五預郡試爲涇縣胡琴崖太守所首拔旋受知
學使鄧少宗伯補學官弟子抑齋公故嘗述事宗伯公親
承提命加以尚書公庭誥丁寧於凡古今載籍與一切經
世之學咸所究心故督課諸郎功最縝密舉業外旁及農
田水利馬政鹽法悉窮流溯源殫極利病恭人又爲周櫟

國司農甥姻禮工詩著有蘭藻閣集爲閨媛所宗君胚胎
家學肩隨諸舅耳濡目染殫見洽聞尤耽吟咏嘗讀五代
史賦十國詞百首全椒郭韻清太史以詩史目之一時騷
壇若杭輩浦厲樊榭諸名流胥引爲莫逆交肄業敷文書
院在舉場日益有聲丁丑春

翠華再巡浙水君恭進迎

鑾詩冊恭和

御製詩篇

召試行闕拜

文綺荷包之賜歸益刻厲銳志科名就學愛山書院十年

河陽李肯菴太守知獎尤深歸養去任君用查初白十年
門下舊諸生句賦詩送行和者成帙顧婁困棘闢志不少
懈至戊子始領鄉薦出副憲陞耳山先生門入都

輦下鉅公爭爲倒屣己丑辛卯壬辰戊戌連上公車俱被
薦不售循例授國子監博士需次春明恭值

詔開四庫館之八年首部未成而三編又積廼全書浩如
淵海以次領校亟難其人大學士于文襄公程文恭公特
疏薦君以原官充

武英殿總校先派

文源閣書君殫心校勘昕夕靡寧經邸中賓友閱定必躬

親瀏覽披繙數四雖手胝目眵不憚煩諸總裁聞而益器之復以第三分

文津閣書奏派校閱君感文字之知不敢始勤終怠自己亥至甲辰六年辛苦如一日疊蒙

尙方哈密瓜石榴果珍品之頒書成蒙

恩議敘主事復荷

增秩五級章服寵榮洵無慚稽古之力云君宦學十餘年以館書爲職業迨官挂朝籍而年已就衰畱京邸又數年歸里甫改歲以脾約疾卒君孝友任恤妣楊恭人病劇血疏籲代不得則哀痛不勝後成痼疾雖暑月坐緹室歛粥

終其身居抑齋公喪亦如之遇戚族尤樂於爲誼單癯者
完聚之幼稚者教督之歲贈族之貧者計口給粟藥其疾
殯其死未嘗有厭勸意自奉極儉約布被繩牀俯仰自得
每念先世以清節傳家絲粟不敢逾分惟以儒素訓勉後
人配汪烏程人候補員外郎諱張女性淑孝事舅姑先意
承志務得堂上歡心治家井井不以纖悉擾君俾君壹志
於學繼朱長興人河南陝汝道諱履忠女婉嫻相莊撫前
室女如己出舉一子劬躬鞠育弱質搆持晨昃焚香頂禮
乾竺清苦自甘忘其爲生長華膺也並以脆促先君卒最
後君仕乃

贈恭人君壽七十有一生康熙壬寅三月初五日卒乾隆
壬子正月十六日汪恭人生康熙壬寅十月二十九日卒
乾隆己巳十月二十五日朱恭人生雍正壬子九月初六
日卒乾隆癸未四月二十三日茲卜以本年十二月十五
日合葬子男一人乘美邑庠生早卒娶袁氏戶部四川司
員外郎諱恭女女三長汪出適候補主事汪尚仁次字候
選州同朱文鼎未行卒次未字卒並朱出孫一懋學邑庠
生娶江氏太學生諱大桂女曾孫女一幼未字君故爲吾
鄉錢籛石宗伯入室弟子及與王秋曹穀原萬徵君柘坡
汪選君厚石孝廉柘石相唱酬著有小芳蘭軒詩詞海棠

巢類稿喜稻堂文集共二十餘卷暇喜講求六書之義與
張餘堂隱君考析大小篆跡及其家常侍兄弟翼慎諸書
研究松雪三橋兩家之法別有茗花山館印譜十卷並藏
於家家有

賜書而收藏益富鉛槧罔貽積帙幾充梁椳今懋學亦能
寶其手澤齋頭插架常滿予得而枕藉焉咽嚔焉受君之
益多矣君雖未展所學而讐校之勤比於昔賢亦庶幾王
儉阮孝緒許善心亞也因志其大者足勸

文治之隆而系之銘曰

天閭廣開奎壁旁燭子政子雲石渠天祿君起名家領校

秘鄭

文源

文津書紬二閣三萬六千牙籤赤軸帝虎鳥鳥虞志荀錄
引領蓬山埋頭芸局畫省榮名藝林芳躅歸老仙潭未更
寒煥內行克敦前修允迪一子蚤夭兩配胥淑黛色四時
烏迴之麓茈此佳城以綏來孝更衍世滋仍昆永福

朱竹友明經暨配孫孺人墓志銘

海鹽明經朱君竹友悼其配孫孺人之亡逾年而歿君次
子孫垣以校錄館書需次京邸奔母喪歸未幾又罹大故
越三載服終爲嘉慶戊午是秋孫垣領鄉薦卜窆兩親於

邵灣山之有坊前斯踵門請銘君藏泣曰不孝奉庭闈督課困南北闡者十餘年今幸雋矣而父母不及待伯兄亦不存語未竟哭失聲余亦爲之感慟往余居太宜人之喪君來唁余苦次信宿書堂顧語及其配輒相嚮歔歔君故親串中一道誼交也余忍不爲之銘

按狀君諱星煒字垂青又字乙青號竹友鹽邑之朱系出婺源唐茶院公諱瓌遷祖勉軒公諱順爲文公再從裔孫元元貞間任嘉興路主簿卒於官遂家焉三傳至君十四世祖半軒公諱光祖始以竈籍居今尚胥里九世祖鄰桂公諱楷自鄰桂公至君咸名噪庠黌未有登甲乙榜者曾

祖諱之濂祖諱拱乾本生祖諱福謙考郡丞默亭公諱廷
掄妣孫宜人君爲默亭公長子幼穎敏從學於從父學顏
學博年二十補諸生受知於諸城寶東臯總憲郡試日病
未得預覆試默亭公怒而撻牀君發憤互晝夜不輟夜讀
書帳中廼入學性至孝默亭公晚患臙脹醫藥罔效君露
禱於庭持刀割股股落暈絕逾時乃甦爲羹以進則以爲
味苦君知病之不能起也銜痛終其身不以語二子每暑
月解衣右臂瘡痕故在也默亭公故友愛厚其同懷弟嘗
推己產均之洎弟蚤世撫遺腹姪成立彌留時復以猶子
暨幼子屬君君視之一如默亭公在時公旣歿會君本生

祖妣卜葬有日君於荒迷中不改卜躬營窀穸盡禮盡哀
又數年葬其考妣俱置祀田君庶曾祖妣陸無出砥節數
十年祖妣劉蚤歲爲未亡人並以君請被

旌君長身闔爽胸無町畦善騎射通知陰陽家言且精軒
岐術脩合藥丸如寶產丹鐵扇散諸名以之活人往往有
神效與人交歷久弗渝有急必出死力濟之及有過又忠
告不憚煩其直諒亦性成也君充貢後甲午一試北雍洎
壬子秋賦挈次子入京今韓城相公獨才君以君赴灤陽
佐筆墨相得甚驩顧情殷望子而君之生平迄未少展爲
可惜已配孫孺人康熙癸未傳臚侍衛衛瞻公諱江女孫

卽君妣之姪有賢行主績尤勤君次子贅於杭挈眷至京
生有子女卽家遠寄縑素出孺人手如新相莊四十載內
助稱得人宜君哭之而神傷也君生乾隆己未十一月二
十九日卒乙卯八月十七日壽五十有七孺人生丁巳九
月初二日卒甲寅五月二十日壽五十有八茲諏吉於嘉
慶七年十二月日合葬子二長程奎監生娶章氏歸安廩
膳生名逢春女服未闋卒次孫垣監生考補功臣館校錄
議敘主簿嘉慶戊午科舉人娶潘氏錢塘戊戌進士翰林
院編修陝西道御史名庭筠女孫七長章金銓殤程奎出
次潘森殤孫垣出次昌壽聘康熙甲戌探花內閣學士顯

諱悅履元孫女乾隆甲午舉人永順府同知諱振聲長女
次昌頤未聘均程奎出次美鏐次美錦未聘孫垣出次潘
鑾殤孫垣出孫女一未字殤程奎出余嘗訪君所居常墓
橋一水迴連自成村落遠望鵝薨知其地爽塏而俗淳樸
君語余曰先人傲廬託處已四百餘年矣因歎故家文獻
非奕世載德者不能而君又教其子以底於成荀子有云
爲善不積耶安有不聞者乎昔張東海世居草蕩泊守南
安其家買宅城中東海聞而悔之說者謂城市不如郊郭
郊郭不如鄉邨顧安得以千萬買鄰而豈意其徒增感舊
之悲哉銘曰

國朝文獻卷一
武原舊族新安朱仕列中外榮簪裾君家十世爲通儒圖
冠方領譚唐虞君起教子驤

皇塗文章報

國懷區區齎志沒地婦先夫二雛去一畱鵲雛七舉今乃
登鄉書雲鵬遙翼看搏扶泣涕乞辭銘黃墟交則金石親
葭莖故人執紼仍素車邵潯山壙臯嶼如佳城同穴淑配
俱用慰且勗無歧趨重來綵繡朱金紆九原一笑如償逋
穀詒孫子綿世譽衍文公後復厥初

族世父蔚巷沈公暨配戴孺人墓志銘

河南修武縣丞岷來九弟以世父母未葬請急歸筮宅於

石門北石橋之原介又希兄乞志塏石語余曰吾兩家雖
鄧禾派別而系出沈邱則一也且述岷來之意曰先世以
忠義著於鄧以循良顯於禾代有令聞懼遂泯沒冀因志
墓之文少彰聞焉余諾之而未暇以爲茲卜窆於嘉慶己
未孟陬二十五日前期敦趨余不得辭

按狀世父諱祖榮字載欣號蔚菴姓沈氏其先河南人始
遷祖維時公諱恆爲伊川先生私淑弟子扈宋南渡累官
朝奉大夫卜居慈谿之鳴鶴鄉友教鄉里架橋便行學者
尊之曰師橋以此大其族曾祖陣師公諱文雄明崇禎庚
午舉人與從姪明史二忠視菴公諱履祥彤菴公諱宸荃

先後執經於漳海黃忠烈公之門公所許陣師潛謚者也
祖梅村公諱光珏娶於陳蚤世遺鼎革流寓吾郡王邁人
方伯一見奇之妻以姪女遂居梅會里貫海鹽康熙壬子
舉人考範亭公諱李楷庚辰進士由庶常厯官江西饒州
知府饒州公四娶一遺生丈夫子四人長諱祖望李恭人
出三諱祖蔭四諱祖修並秦王孺人出次卽世父妣爲蜀
王恭人早從宦遊充國學生饒州公故負文望尤著廉聲
宦久益貧世父護脊屬先歸歸裝惟圖書數千卷經營盡
瘁乃買宅一區入籍秀水奉饒州公林棲色養偕兄弟左
右承歡出世父力爲多世父學不務章句於詩酷嗜潯陽

吟咏不多直抒性真當其得句雖炊烟屢斷顧處之晏如
吹參差自若尤精俞扁術又希兄爲余言曾患時症垂危
諸醫束手世父爲處方手和劑灌之獲甦嘗開局吳閭傾
數百金施藥不二年金盡垂橐歸愛佳山水次壻宦楚南
迎之往徧遊三湘九疑尋邁疾卒於官解配母戴孺人
德清舉人一寧公諱元枚女年十五來歸以淑孝稱處娣
姒間無間言長壻官近畿迎往解舍亦以疾卒世父壽五
十有二生康熙壬辰正月廿一日卒乾隆癸未三月廿四
日世母壽五十有九生康熙甲午正月初七日卒乾隆壬
辰正月十四日子二長善長娶張氏次源卽岷來娶張氏

女二縣丞署灤州東目吳爲鼎祁陽縣丞吳志寬其壻也
孫一綬娶葛氏業儒善長出女一源出未字曾孫鯨往歲
甲寅冬余以先人葬事索遊豫河岷來時主輝縣簿卽耳
其治行泊上官以爲賢俾丞修武行攝邑篆矣顧以世父
母雙殯尚滯淺土涕泣丐歸再三挽留之不可嗚呼貧而
仕仕而亟歸以葬其親其於風木之感爲何如哉世父可
謂有子矣銘曰

南江沈傳伊洛曰師橋黃漳浦三高弟炳勝朝祖賢書壻
於王梅里僑考吉士翔郎署出守饒有次子營第宅返樂
郊稟過庭旣安禮詩學陶貧忍飢賦長句吹洞簫活人術

肘後方手自抄極衡湘泛洞庭遊以敖依女夫禦兒鄉安宅兆贊府賢辭三釜起一邱司勳筆詔雲來壽諸幽

節孝施母沈孺人墓志銘

烏成施君雲甫繼室沈孺人以節孝聞其歿也嗣子憲祖卜窆於三圖村稼字圩之新阡旣請旌於

朝復徵郡之有辭筆者爲詩歌張之而納窳之文未具廣文皇甫菽堂以屬余遲三年而請益固孺人余同姓也文以節重又奚敢辭

按狀孺人姓沈氏秀水新塍鎮人太學生譚德元次女幼端謹不妄言笑父母並饒愛之九歲失怙哀毀如成人母

劉授以女誠諸書輒能通曉大義年二十七爲施君繼配時孀姑姚太君在堂性矜嚴鮮當意者孺人獨能得其歡心甫兩載施君邁疾暴卒孺人呼搶欲絕誓殉以身姚太君涕泣諭之迺強起進飯粥立從子憲祖爲嗣憲祖生纔兩月孱弱多疾疾孺人鞠育恩勤多方療治始得遂長迨就傅則又衣帽泣之篝燈課誦不以一子姑息少弛其勞施君前室嚴遺一女僅七齡孺人撫之無異已生稍長女紅鍼帶躬率先之及笄治奩具擇嫁士族姚太君病牀第者互數月孺人侍奉湯藥不假手姬婢每晨起炷香露禱籲以身代及不起營辦棺衣不以貧窶殺禮哭無時兩目

漸失明已復爲舅姑謀窀穸而後卽安自此荼苦備嘗心力俱憊矣居亡何孺人患疾亟爲憲祖授室禮成病沈綿遽卒蓋新婦入門未期月也凡孺人奉甘旨築斧堂泊嫁女輓襦延師脩脯至是儼皮束帛纁裳緇袍諸費皆取給於十指所拮据嗚呼可不謂難哉孺人卒以乾隆四十三年戊戌九月廿九日距生雍正六年戊申五月廿日得年五十有一子一卽憲祖國子生女一諸生鈕應奎其壻也先是孺人五十輓辰憲祖繪節香圖以壽里黨稱之昔許炎貞母吳砥節四十餘年所居有疎竹寒梅因繪高節寒香圖遠近題詠盈軸見者以爲華考吳母有子四人仕隱

各半而表母之節必推炎貞炎貞固以道光其身者也綜
孺人一生前則以婦兼子後則以母兼父其賢與吳母畧
同今憲祖所以彰顯其親者亦復惟恐不至非卽炎貞其
人耶是母是子足以爲世勸矣銘曰

烏墩水清九曲流迴腸千結賢母憂始憂稚藐疾不瘳終
憂宗事須好仇子婚母逝月未週終天泪睫瞻庭幽母鞠
子恩詒孫謀子表母節榮烏頭更乞文字傳千秋墩水交
滙環松楸永錫爾類承餘庥

頤綵堂文集卷十四終

頤綵堂文集卷十五

秀水 沈叔埏 埴爲

家傳

十世祖用霖公九世祖梅石公家傳

吾十世祖用霖公失其名妣高孺人九世祖梅石公諱默
失其字妣姚孺人生卒無可考約畧爲明化治間人舊族
系圖云用霖公名儒高隱梅石公一作墨處士徵命不應
隱居長水著有梅石居集集佚不傳從高祖苧莊公示弟
詩云昔我先人實懋厥功靡不夙夜克繼其宗蓋爲二初
祖言之也初祖來自鹽官以儒雅爲業有宅一區歿卽葬

焉鹽官始漢吳王濞本名海昌今海寧州是也考鹽官諸

沈

宋劉過有鹽官借沈氏屋詩

海汾里最著其先乃宋建炎初樞密忠

敏公諱與求扈蹕至臨安自德清遷臨平再傳而千四公
遷州之西鹽倉

皇朝康熙己未詞科耿巖先生

珩

其裔胄也又考鹽官割

海鹽縣南境置析白漢建安五年見吳陸遜傳元季孝隱

先生諱壽康悃孝不仕與程異隱爲道義交墓在縣之豐

山久爲人仙明正德末郡守徐白川

盈

檄還其子孫傳云

都邑之士則知尊瀾矣大夫及學士則知尊祖矣昔王文

恪白序其譜有曰夫士也十世以前希不憚焉耳余家由

遷祖遡諸宋元悠悠世祚訖無考按雖不啻譚子之奔莒狄武襄之拜梁公然辨其由來知波瀾莫二三百餘年後耳孫往往得自傳聞鹽官之爲縣與州各存一說顧或出或處惟忠惟孝以是爲家牒光抑以是爲祊昆勗當亦吾祖之志也夫

八世祖禮部公家傳

八世祖諱詔字朝恩明禮部儒士妣鍾孺人蓋嘉隆時人高伯祖半環老人世業遺規云公遺田三畝六分遺金百兩分三子則未知其田與金爲祖若父所畱貽耶抑公節縮衣食所餘耶顧其爲詩書之澤清白之傳則數世而下

若或見之已其田先以贍子姓之孤貧者入

國朝康熙十九年庚申族議以供三世墓祭迄今三百年
食舊德而服先疇不改也公自長水遷於熙春橋家遂穎
穎日起而子孫漸繁書曰若考作室旣底法厥子乃弗肯
堂矧肯構厥父舊厥子乃弗肯播矧肯穫厥考翼其肯曰
子有後弗棄基此雖爲王者言之然大指謂創業之艱欲
後人世守之而弗替則其義固通於士庶人也嗚呼禮部
公奕世儒素舌耕將及百年而其基如此吾後人尚念之
哉

七世祖愛溪公家傳

七世祖愛溪公諱應文禮部公第三子行履無可考

叔璣

所知故明萬厯四十一年癸丑熙春橋將就傾圯公偕里中父老子弟聚族而謀募財鳩工斲石懸磴始事於十月至四十三年乙卯八月而落成公率姪高伯祖鄉飲公實督其成見重建牙前橋碑牙前卽熙春橋也文載湯齊嘉興縣志中四十二年甲寅九月遺囑三猶子分授田廬貲財奴婢各認里役最爲平均三猶子者七世伯祖鴻臚公三子長卽鄉飲公諱孝次諱思聖次諱思忠囑內新亭見亭遂亭是也

叔璣

什襲裝池敬識跋語外賢要判書今亦

猶有存者妣蕭孀人嗚呼

叔璣

爲公昂孫相距幾二百年

每欲考公遺事卽生卒年月不可得而詳然使後之人第
觀於此二者之所爲則公行誼之孚於鄉而信於家也亦
可知已

六世祖愉亭公家傳

六世祖愉亭公諱思義愛溪公長子悅亭公諱思禮其季
也公生萬厯十二年甲申六月十四日歿崇禎十四年辛
巳四月初七日年五十有八妣倪孺人生萬厯九年辛巳
六月十三日歿以

皇朝順治九年壬辰正月二十一日壽七十有二叔疑爲
公來孫相距百五十年欲考公行事而銘志不存所可知

者郡城內廣福楞嚴二寺大鐵香爐鐫諸檀施姓氏有公
名耳昔隆亨華守固璣求訪先世手澤自十六世以上誌
傳具存獨闕六世祖樂靜公誌君多方求之不獲人或給
以某處曾見之君冒風雨立往尋訪步走數十里不得亦
不悔也旣十餘年竟於族孫所得之魏叔子以此志其墓
叔堤魏之多矣又案左傳晏子謂思義爲愈公字似當从
愈然愈與愉通荀子正論篇心至愈而志無所詘註愈讀
爲愉故世系圖作愉至今仍之又吾鄉繼山少司馬諱思
孝當神宗時建言拜杖朝野著聞吾六世祖同懷暨從兄
弟六人名並與之爲行少司馬之先伯讓公禮元末避亂

來白江都與寒家故非一派豈命名時有取於思齊之義耶抑先世曾還往通系牒耶斯則有不可知者已

六世伯祖鄉飲公家傳

公諱孝字新亭明鴻臚秀溪公子爲

叔挺

六世祖愉亭公

從兄幼攻制舉薨以羸疾廢試善事父母色養承歡獨完弟妹婚嫁公伯仲三人長卽公次諱思聖字見亭次諱思忠字遂亭各受分田二百二十五畝屋三區公尤好行其善利人利物不惜貲錙族親以急告者無弗分橐應之務厚植陰德以裕後昆崇禎十五年辛巳歲旱穀不升蠲米平糶活里中貧餒無算有司公舉爲壽官事實載蕭師魯

等所纂郡紀六年十月十五年十月兩次推擇鄉飲衆賓
介賓妣曹繼張卒年八十有一

高伯祖鄉賢公家傳

公諱璜字若水號半環晚自號蒲冠叟幼稟父新亭公教
言動必以正母張孺人茹齋日誦佛經公以不得奉肥鮮
晨昏在視安節尤曲意承顏及新亭公高年抱痾公疏禱
城隍願以己壽續算果邀神佑獲痊鄉黨詫爲孝感公年
十八爲高材生五踏省門不遇無幾微怨尤鍵戶著書用
迎來學同學如謝元仲呂鳴甫董君寧徐子雍諸先達皆
推爲祭酒經術詩詞外復畱心地方利病遇事昌言其省

刑平賦均田均役諸議當塗嘗采行之旁通星卜軒岐之術肫肫以利濟爲懷有諸生薛姓者飢荒困瘁衣食不繼鬻其子於富家公惻然傷之立斥所有令贖歸薛又言無以餬口公復延館於家俾課其養陳某亦諸生父充里長逋糧數十金爲運弁所辱詭以遺產求售公廉知陳實無產而憫其窮急與之金折券還之不責償也戚黃某室停雙棺貧不能舉殯公厚賻之而連之殯殯三日其家旋破鬱攸黃感公之德終其身買女秋蘭諱言其父一日其父至公見其彬彬儒雅也問何業曰業儒公卽還其女俾擇配焉鄉之豪族足其田畝而躐公之田佃以虧租來訴

公笑而置之不數年豪貧其田盡歸於公公語人曰曩者
彼所侵幾何而暇與之校耶居常推其有餘睦嫻任卹存
賑宗黨撫庇孤惇延師課黃氏甥在飛入學黼書成進士
而戴紫臣張伯生諸君並以公之家爲家其最著者也至
郡邑有興作公以身倡率者葺學宮繕城垣所在殫其心
力每遇儉歲必捐餘粟減糶行糜以起溝瘠甦塗茆他如
囚給衣糧疫施藥物收棄嬰拚露齒此於公爲小節不勝
書故明崇禎十五年前學道王舉公優行入

皇朝順治七年十三年十四年學道翟谷暨按院趙鹽院
祖並以德行推公十六年郡守尹舉行鄉飲酒禮謁公爲

介賓康熙八年郡守王復謁公爲大賓兩預賓筵同於若
考洵可謂無忝所生已公沒康熙十六年丁巳十一月二
十六日距生明萬曆二十五年丁酉七月二十八日享壽
亦與新亭公同沒後三十七年有司上其行誼得祀於郡
學之鄉賢祠蓋吾郡以諸生祀鄉賢者自海鹽許長聖間
始公起繼之嗚呼人不自立而欲借重於名位名位碩足
以重人乎哉

按公事實冊有云族有一赤貧者父子子處無以自存

公月給米五斗歷十五年無間

叔堽

先高祖希珍公同

懷三人先曾祖文開公同懷二人惟高叔祖來珍公無

子以曾叔祖天驥公爲後

國初順康間吾家獨爲南阮冊所云子處者隱其名字
幾同不知誰何之人然其爲七世祖愛溪公已下一支

必矣乾隆三十七年壬辰郡裔重葺鄉賢祠宇

叔埏時

爲諸生捐餼錢伙之四十六年辛丑

叔埏

以中舍充一

統志分校官請於總修南匯吳稷堂師於是公之懿行
由郡縣志及浙江通志以次列於統志登載炳如昔楚
頃襄王問莊辛之言曰君子之富假人不德不責食人
不使不役親戚愛之衆人善之若公者吾宗子之具二
性者也而此其宗若此微君子之富而能之乎抱朴子

曰施厚者報常晚韓子曰莫爲之後雖盛弗傳嗚呼後
先百五十年使叔挺萬一有以報公之施而傳公之盛
者殆亦有莫知其然而然者歟

叔祖學正可山公家傳

公諱時字建勳號可山行四鄉賢若水公之諸孫禮部公
七世孫也少有至行侍母曹太安人病衣不解帶者數月
及歿哀毀骨立幾以身殉考南田公諱淞遐諭之曰汝從
死母奈生父何因強起奉旨甘力學養志以五經補博士
弟子員與弟靜齋公諱福英並有聲橫舍試輒冠其曹康
熙四十一年壬午登賢書靜齋公亦領癸巳

恩科鄉薦雍正元年癸卯選授德清縣學教諭在任十六
年勦修明倫堂忠孝節婦祠及清溪書院以次訖工遇歲
賺郡之牧養委勦災賑尤務活人有劉徐兩縣令者各以
虧帑去官一鄰於殍一繫於獄公屢捐全俸倡諸紳士卒
俾生還邵司訓者涖任月餘以試事病歿於郡貧無以殮
公傾橐飲之俾其子扶櫬旋里每月課必捐貲預備席坐
殮具分孝弟忠信禮義廉恥八字編號治點文章必細加
評隲獎勸勤拳數年間鄉會魁聯翩鵲起而丙午壬子乙
卯文武三領解胥出其門一時贈額者文宗帥則師範式
矜郡守唐則裁成後學邑令徐錢則武源雅化清邑典型

生童則師範無雙善培士類咸以爲克副其稱也乾隆元年丙辰聞繼妣金太安人訃奔歸邑之鄉士大夫耆老生徒輩送者皆垂涕服闋遷安吉州學正在任六年其課士一如德清時亡何適梅里楊氏女歿子殿爐繼沒公感傷殊甚遂決志丐歸當途爭挽留之不可得歸六年卒十三年十月十六日也壽七十有八臨終遺言猶惓惓勗子孫以事業在忠孝云宜山居士盛遠嘗館吾家之苧莊以詩設教老而無後比卒公述耆儒金鼎聞人奎耀狄士斌王家棟沈爰宗洪施烈陳穀周琅宗瑞麟闕韋張五辰及遠遺行請學使者旌而祀焉公著有瑞芝堂詩草詩文外尤

工山水筆意清逸而敏速過人人得其尺幅者與先王父東谿公畫並珍之余於公爲從孫公之卒余年甫十三宜及見之而未克見則聞公爲學官未嘗受諸生常贄有以贄來者則諄復誨之曰還昇汝買書讀之故湖人迄今稱述弗衰昔朱卓月言其先大父榮祿大夫年雖老溺器不假手僮僕曰何得以汗穢累人惟公亦然公所居柳溪書屋去今四十餘年孫枝秀發奕葉衣冠宜哉

從曾祖姑朱節母家傳

節母余從高祖明中府厯事介菴公女同里朱竹垞檢討胞弟諱彝鑒字千里之配也檢討幼受知於公公儲書最

富招檢討來學因讀書苧莊爲公別墅集以是名事見
靜志居詩話順治十七年庚子母年十七歸於朱歸十年
而癸鑒卒無子檢討以季弟癸玠子德鉉子之德鉉生甫
三歲母躬自鞠育不殊已生孀居後族姻以歡宴召謝不
往每歲時腰臘諸從子以禮來見答拜不踰閭力勤操作
尤不以貧故乞貸親黨飲冰茹檠終其身

節婦仲孺人家傳

孺人仲氏余從高祖幼玉公配幼玉公諱漣宗玉公同懷
弟苧莊集載示弟四言詩是也幼玉公蚤世無子以宗玉
公次子□□爲後孺人事迹無可攷家藏明崇禎十五年

八月二十六日一帖云嘉興府爲淑德久彰貞操素式懇
賜俯採輿評請申具題旌表等事蒙分守道唐批本府呈
詳嘉興縣節婦仲氏貞節緣繇蒙批仲氏貞節勘結已明
允宜旌表風勵仰候兩院學道詳示行又蒙提學道王批
仲氏貞義可風准給扁旌異仍候彙詳具題繳又蒙按院
左批仲氏貞節可風仰府給扁旌表載入憲綱繳蒙此除
徑行縣給扁旌表外合行給帖付照爲此合給帖付節婦
仲氏收執准其一丁侍養仍免雜泛差徭以示旌揚至意
須至帖者嗚呼明政不綱久矣顧昔日當塗諸公尚拳拳
於一婦人之節若此曾不再葺遘鼎湖之變孺人蓋有抱

不及旌之憾度亦時勢所無如何者猶幸此帖之存俾後人因以考知其畧雖未得邀綽楔之榮夫亦足光家牒也已

節孝厲孺人家傳

孺人厲氏爲處士諱國泰女余從曾祖功尚公配公諱二最字仲吹爲遂亭公諱思忠孫諸生奕韓公諱玉書次子孺人年十九來歸結褵七載夫以勤學病瘵夭死年僅二十有五寶康熙十一年八月二十八日孺人欲以身殉投繯者屢賴姑吳氏救免獲甦吳亦節婦也自是孝養孀姑躬代子職又四年姑患重疾左右湯藥衣不解帶者九十

餘日姑亡哭泣盡哀喪葬成禮里鄰以爲難沒以雍正五年壽八十距其生順治五年戊子砥節凡五十五年循例受

旌以鄉飲公孫南田公第六子書山公諱暉爲後孺人有女嫁州東灣朱氏爲鄉賢舒城令千仞公次子懷谷諱脩永其後人猶藏外祖妣像余嘗爲孺人像贊所謂寒宗增耀者也

節母倪孺人家傳

節母倪孺人余曾伯祖晉侯公諱穀配公年三十一而亡母僅二十有八遺孤子三樹蘭樹萱樹芝皆幼母矢死撫

孤備嘗艱苦旣而三孤成長以次遊黌舍列成均卽余從

祖彥馨公研渟公鶴樵公也館盛宜山高士於家與李南

溟

含漢

盛匏菴

大鏞

張博山

劭

陸東村

交卓

錢廉江

綸光

汪碧巢

森

諸公竹林唱和並擅能詩聲母年七十學使曲阜顏學山

先生

光敷

題額旌之禾中士大夫各贈以詩輯爲松筠集

行述

誥封太宜人顯妣石太宜人行述

嗚呼不孝兄弟自失怙以來鮮民之生幾二十年出入瞻
依繫母氏是賴中間遭家多故長兄伯坤相繼卽世仍歲
悼媳殤孫大損老人懷抱而疾發旋已起居食息差幸勝

常追維教育恩勤

不孝叔挺

倅叨薄宦獲遂祿養之私自

丁未改官吏部以太宜人春秋高烏私念切請急遞歸未
嘗敢就館於百里之外

不孝季奎珏

偕遊豫章或間歲一

歸或留歲餘復出亦未嘗有三年之淹方謂年開望百神

明不衰愛景舒長期頤轉盼倘區區人子之願默相可憑

不孝叔挺

當踵敏

闕廷籲頌

宸翰豈非

重熙人瑞爲

壽世所希逢哉詎

不孝等

祐薄孽深不自顛踣

不孝叔挺

則侍疾無狀挽救末繇

不孝季奎珏

則甫聞病耗隨接訃

音擗踊呼號五中崩裂終天之憾

夫復何言顧偷息彊顏

不卽從死痛念我母一生事姑及相夫教子諸淑德懿行

實有可以昭管彤而光家牒者脫不及身紀述則

不孝等

罪益滋大用敢和泪濡豪麤敘梗概冀當代大人先生垂

覽焉太宜人姓石氏世爲吳郡望族聚居齊女門內之皮

市故第有撼山堂曾祖劍鹿公妣戴朱兩碩人祖用卿公

諱新國字行之明季篤行君子人

皇朝蹈詠昇平不求仕進與張綱菴闇然韓復菴芬歸莪

菴聖脈姜飛六逸霏張襄臣治陳子真吉士陳子夔樂集

思九居焚香瀟茗爲文字交康熙十四年乙卯年七十有六猶康彊無恙吳人推先民耆德焉娶於田有丈夫子四人長爾學公次爾行公三爾達公四卽不孝等外王父爾敦公配外王母懷孺人生兩舅氏長諱舍英字蘊中次諱舍章字懷中初外王父授室後讓所居於諸舅挈眷屬僑禾市隱絕少親知惟與錢廉江上舍及其子曉村司馬最友善交在紀讎上舍卽文端考也從母三人長以純孝不字終其身 不孝叔疑嘗請於母而爲貞孝石長姑傳者也三嫁白洋朱氏之遷禾者四嫁乍浦張氏太宜人行五天性婉婉聽從奉長姑言惟謹故在室時卽以孝謹聞五十

八年己亥太宜人年十九歸我先贈公月樹府君寒家自明禮部公少子七世祖愛溪公與兄鴻臚公以高貲好施予著于鄉稱熙春沈氏迨高曾世居東湖獨爲南阮先王父東谿公以諸生薦充

暢春園畫院供奉京邸聞曾祖王父之訃奔歸以毀卒於聊城年僅三十有八先府君髫髻零丁賴先王母龐安人於項尾流離中鞠之遂長始入城住徐閭鄉祠左居僅數椽逾冠而婚草草成禮太宜人既來歸其事戚姑也怡聲柔色應唯進退抑搔扶持動合禮則見者不復以單煢忽之問衣煖寒則漱澣補綴繼請惟勤問何食飲則飪熟親

調嘗而後進井曰饑饉操作而前善體堂上所有事而任其勞先王母以新婦賢視之如己出先府君幼聰穎書經耳必誦以孤藐故棄儒逐什一艱苦備嘗奮自樹立太宜人以儉勤佐之家漸以起辛丑歸朱氏姊生雍正癸卯長兄生丙午歸吳氏姊生至壬子四兄佩玉生是年先府君買天星湖里馮氏宅卜居焉堂構鼎新戚族咸賀先府君得內助力甲寅五兄建庭生乾隆丙辰不孝叔塏生巳未歸王氏妹生壬戌甲子丁卯不孝季奎珏及最小妹生太宜人凡十產先府君愛之如一男女遂不異長時家道稍充從不一求食母或勸太宜人奚自苦爲則曰如之何其

饑人之子以哺其子也內惟五兄以八齡病殤今子女存者尚五人先是所居隘長兄往就塾於朱荆山先生諱振玉學舉業譚譚山先生諱孚先學楷書太宜人以時餽遺弗絕戊午延同里俞蘭被表兄於家繼之者濠股張東銘先生共六年先府君壹意課子雖甚嚴未嘗加以捶楚獨太宜人衣幅涖之不少假辭色侵晨趣入學返必面揖罷出糗餌梨栗分噉之夜則先府君必令覆所授書聞琅然聲反得鼾寢太宜人箴管線續坐於旁一燈熒熒率宵分以爲常冬春具則燭黏米貯瓶罍多市夜餽實之未卒讀不得哺亦不卽安也

不孝等

駮稚好弄間從外兄弟作排

衙戰陣趯鞠迷藏諸戲太宜人見必扶之他如碁圖采具
苟有妨于學者並禁絕之新年賽六赤以爲娛則尤怒悉
取而投諸火笞僞隨之曰吾教汝挾筴讀書乃博塞以遊
非我子也撻之必力

不孝等

長跪自責曰當痛改乃止待

館師尤加謹有人所甚難者館中飲饌非手自烹飪者飭
勿以供衣裳垢綻輒親爲澣濯縫紉不假手嫗婢以爲欲
師之殫心吾子可不知尊禮耶甲子以後

不孝叔埏

隨四

兄率

不孝季奎

就傳於家蔗田先生諱琅閩八九年有無

相通先生有所須太宜人必立應也

不孝珏

則從四兄及

不孝叔埏

學太宜人亦不肯以少子少存姑息

不孝等長

兄少患痘幾危先府君少縱弛之不令竟學年十六令攝

家棟不復問生事最後

不孝季奎

佐之亦廢學庚午勦先

王母之喪太宜人哀禮交盡壬申

不孝叔埏

始遊鄉校先

府君嫁娶紛繁太宜人盡斥衣簪以飲戊寅先府君以長

兄病驚憂亦病遂成癘疰坐是費不貲距移居三十年而

家已中落矣壬午先府君鬻居第僅能償逋

不孝叔埏遊

大梁長兄客崇明四兄客邗上

不孝季奎

寄食友戚家

幾同萍梗從此餬口四方各矢負米之志比

不孝叔埏歸

就婚奚橋孫氏而長兄已僦居駟馬橋側貧無宿儲毀菽

以飽膏不繼則熬辦香夜坐

不孝叔埏

時時從婦舍來省

以未能仰事爲慙太宜人無幾微怨尤之色是夏 不孝叔

暨 不孝珏 俱受知於武進錢文敏師先後館文端第舍

四兄亦補博士弟子員庚寅 不孝叔堦 買斜橋老屋奉兩

親邀兄嫂城居共爨率婦子承歡 不孝季奎 遊嶺表四兄

偕 不孝珏 館今觀察錢芭堂世叔中牟縣署稍稍寄脯脩

佐養四兄尋沒於署 不孝等 隱之不令兩親知也甲午 不

孝叔堦 舉優行充貢明年入都長嫂歿於家又明年春邁

先府君之變太宜人亦七十有六哀痛不勝惟長兄暨 不

孝珏 躬親屬纊 不孝叔堦季奎 以次奔歸創鉅痛深所幸

我母固健在也秋又哭冢孫傳璧璧兒爲 不孝叔堦 轉生

子後於伯兄年十一畢六經太宜人最所鍾愛至是以暴

下殤明年去斜橋賃居文端西第

不孝叔姪

服未竟爲今

相國王韓城師拉之北上

不孝姪

先已遊豫戊戌

不孝叔

姪以太宜人左右須人寓書趣

不孝季奎姪

畢娶禮成而

長兄病歿會

不孝叔姪

試補正紅旗官學教習旣浹歲假

旋爲太宜人八十壽恭逢

鑾輅五巡

召試

行闕蒙

恩授官

不孝等

洗腆稱觥謂太宜人辛苦萬千至耄齒始

見其子之簪翼鵷池差可博高堂解顏顧亦未嘗斯須有

充訕意也是冬不孝叔埏初筮入京瀕行眷戀庭闈拜辭

嗚咽太宜人勉以報稱及時獨不作門閭倚望語不孝珏

仍遊豫中惟不孝季奎留侍不孝叔埏少無宦情雖趨走

省垣而望雲馳慕夢寐以之每約不孝珏當頻頻寧觀會

甲辰下第假旋適不孝珏亦以獻賦迎

鑾自豫邁返因有捧觴歸及糲如火何減紅綾入宴榮之

句喜親之年不自知其流於篇詠也丙午春不孝叔埏假

滿還京明年雋禮闈蒙

恩擢拜司勳入署見孝治堂額心忤忤不自安亟陳情請

養歸而

不孝

適舉子因命名曰襲繡未幾芑堂觀察守

陳州以艱歸

不孝等

質廡已逾一紀戊申夏五歸晚霞方

伯強

不孝叔姪

往課其子倡年舊諸君分廉相飲因買白

駒巷宅在兩帶湖間己酉築帶湖書堂板輿奉母太宜人

蓋五遷而始有寧宇庚戌九秋爲太宜人慶九旬旬餘戲

綵太宜人中夜觀劇無倦容戚懿來祝者咸謂老福未有

艾也辛亥

不孝叔姪

婦孫安人病歿太宜人哭之慟秋間

符氏筮舉一男名承綸

不孝叔姪

自丙申喪子垂十五年

太宜人甚以爲憂綸兒旣週晬日啞嘔學語於大母前

不

孝季奎

先舉一男曰寶芝至是已幼學孫枝繞膝娛侍舍

飴太宜人未嘗不顧而樂之昨歲癸丑兩孫閱月而殤太
宜人慟甚病不識人百計療之乃小愈是冬 不孝叔埏長

女方贅壻太宜人未及預觀對筵而輒禔瑣屑猶復切致
拳拳獻歲漸就安康三月晦 不孝叔埏 會逢辰諸君於滌

湖逢辰者 叔埏 於陔養之餘集同歲生爲文酒之讌者也

讌罷諸君猶嘖嘖談 叔埏 獨有老母暮歸太宜人語 不孝

叔埏 今日客畢至否酒肴精腆否定後 不孝叔埏 始就寢

詰朝仍健食亭午忽北牕風過太宜人慄甚扶就牀息寒
熱微喘喉中有痰亟延盛春山上舍診之上舍爲吳門繆
氏高足曰有宿食用穀麥芽消之而以蔗漿潤肺 不孝叔

延請更以杏酪上舍以爲然連投蘇葉蘊梗與玉竹而食

不少進初三日延章翁魯璠來診云左脉弦右沈滯舌色

黃絳而乾感寒而食不能運語與盛同俱未敢徑投補劑

初四日連用神麴餘藥如前加以蓮棗病仍未差初五日

天未明不孝叔延遣王氏舉一男亟稟知太宜人則甚喜

囑多備雞子與洗兒錢是時日高矣猶笑言不改也舖後

聲息漸微不孝叔延偕姊妹及諸女孫環伺之見太宜人

下體不復能動不敢遽噉噉豈知夜方半太宜人竟捨不

孝等而長逝耶嗚呼痛哉太宜人以殤幼之故悲忿填膺

及聞不孝叔延得男喜形俄頃含笑彌留又孰知此孫之

復殤於彌月哉此皆

不孝叔姪

惡業叢身降之酷罰禍延

所生尚忍言哉而

不孝季奎珏

遠客章門病不親湯劑歿

不視殮舍其爲沒身銜痛又當何如哉太宜人敦龐淳固

氣體端凝有兼人之稟自少至老未嘗有疾每旦起最蚤

必執婦功不食異味不御鉛華無衣裘統綺之飾寢必易

破衣所臥薪薦藁席雖沍寒不除八十後直身危坐竟日

巖然稀言雅善飲夜可盡蓬萊春三巨杯逾九十眼不眵

昏髮不宜白間生黑絲壯盛時過於勞勩老則手足拘攣

不仁

不孝等

請王掌科文園先生處一方用人銜地髓龜

板兔絲莢肉棗仁雲苓白芍歸身桑枝蔓冬龍眼十二味

遇二分至飲五六劑歷十七八年之久

不孝等

名之曰益

壽方性尤淑慎先王母歿事先府君又二十七年同藏無
間先府君慷慨肯周人之急太宜人輒贊成之傾橐無吝
先府君故好客當有餘時內外授粢常十數人太宜人爲
治具款畱不少厭倦尤加意親族孤稚表兄弟幼清少白
俱就學吾家五表兄蒼琦太宜人疎屬也畱吾家數年視
猶子也頃聞訃至自吳哭失聲君白子萬兩弟童時赴東
縣試止宿太宜人夜半起爲炊食之迄今稱道不去口王
氏妹歿我家珩亦繼夭遺二孤

不孝叔姪

奉太宜人命撫

之成立乃去先府君週甲後病亡善怒怒亦易息小不如

旨則誚讓交集太宜人未嘗有一言之忤村娃鄰嫗引坐
深譚多解推之惠下逮臧獲輩悉待之有恩有過亦不言
所謂不棄一人於惡也太宜人不讀書而行事與古德象
女師之篇閭合內政整齊弗渝常度賓祭豐潔截肉必方
至如醬齊視秋旨蓄禦冬悉手自爲之不孝等能言則戒
以噦噫噦咳能食則戒以拈飽舐指能行則戒以毋撥毋
蹶不孝叔埏諸生時燕侍食于文端公見叔埏用挾先菜
後魚肉未飯不先食截未醕不遽飲悚然曰君殆有母教
耶叔埏敬對公歎曰何其酷似我太夫人也不孝等宿
見不孝珏爲不孝叔埏展其枕篋席褥執禮無違公曰家

教如此他日必與君申以世姻今不孝珏與竹泉同學爲

兒女親家踐前諾也不孝叔埏初至京飲籩石宗伯寓酒

間以博子爲令坐不辨六著二莞被罰霑醉越歲不孝珏

至京亦坐不知博子致醉宗伯訝曰此鄉人中所罕觀者

坐客笑曰卽前者某同懷弟也故不孝叔埏珏至今不知

碁局幾道不識撈蒲齒名猶秉太宜人教也不孝叔埏嘗

讀史志見宋黃巖郭琮事母恭順母年百歲耳目不衰飲

食不減鄉里異之至道三年轉運使狀聞有詔旌表門閭

明年母無疾而終顧考琮事絕輩酒者三十年以祈母壽

而不孝等並不能佞佛齋日無多媿恨奚極明狂邱劉元

震元霖兄弟俱官九列以母年近百俱乞養親進賢饒位
饒仲累官侍郎母劉百歲先後以侍養歸萬厯間海豐楊
夢山號太宰母年百有餘歲尚康健

國朝河陽趙玉峯少宰以詩文娛親母亦百歲曩寓春明
於書攤購得少宰綵衣集寄示八九兩弟敬識數語以寫
仰止之誠之數人者雖名位懸殊不敢竊比而禱祠母壽
則此志畧同今而後雖欲倣劉師文疏增母壽而無望矣
是皆不孝兄弟之罪也嗚呼痛哉太宜人生於康熙四十
年辛巳十一月初五日戌時終乾隆五十九年甲寅四月
初六日子時享壽九十有四爲我顯考

皇贈吏部稽勳司主事加一級月樹府君諱兆熊元配子

六長伯坤太學生娶孫氏□□公女次佩玉邑庠生聘□

氏太學生□□公女俱前卒次建庭未聘殤次不孝叔堤

甲午科優貢庚子

南巡

召試一等

特賜舉人

授內閣中書舍人丁未進士吏部稽勳司主事娶孫氏學

博憩亭公孫女皞如公諱熙女

勅封安人先太宜人卒次不孝季奎太學生娶張氏徵君

浦山公諱庚孫女歲貢生蘭陔公諱時敏女次 不孝珏增

廣生甲辰

南巡

召試二等娶范氏長沙通判松厓公諱曰智孫女太學生
方怡公諱章浩女女四長適朱嘉賓公子名時敏次適吳
懿中公子諱濬次適太學生王憲章公子太學生諱學雍
並前卒次適天麟公子名華璣孫 惟欽卽傳璧 不孝叔

姪出嗣伯坤後幼未聘殤惟鏞卽寶芝 不孝季奎 出幼未

聘殤惟鋈卽襲繡 不孝珏 出幼未聘惟鉢卽承綸惟武卽

長齡 不孝叔姪 出未聘殤孫女五長適學博陸李村公子

名開榮乙卯

恩科進士現任國子監學正次字

恩貢生范治堂公子名之戊並

不孝叔姪

出次字廣東南

韶連道李□□公孫刑部郎中湖北漢陽府知府雲莊公

子名德懷

不孝季姪

出次字

贈戶部員外四品蔭生錢東原公諱汝鼎孫庠生竹泉公

名洪子庠生名械餘未字並

不孝孫出

不孝等

苦幽荒迷

詔無倫次惟望

有道仁人錫之誅銘川輝寔壤

不孝等

世世子孫感且不

朽

亡室孫安人行畧

嗚呼余婦孫安人之喪衾裳未撤我母太宜人撫之而哭
曰天平吾耄矣方藉汝送吾以待終邇今吾轉送汝耶余
聞而盡然神傷冀有以少紓我母之悲而未能也越月而
請封

恩綸至又數月而兒子承綸生比卒哭迴憶廿有六年糟
糠內助恍如昨夢顧其顯顯在心目間者不可沒也用件
繫其實爲他日志墓底本俾家牒有考焉

安人姓孫氏外舅皞如公諱熙次女其先平湖人明南京
刑部尚書贈太子少保謚簡肅公八世孫女

國初中書舍人漚觀公諱鍾琦其高祖也曾祖文學青嶠公諱涓祖學博憩亭公諱士棠安人齟而失怙外姑姚太孺人年三十有二守節鞠諸子女賴外祖妣孫碩人經瞻成立碩人爲舍人女孫嬪於姚家豪於貲而不類因挈其女來歸卽余外姑也安人幼有慧性碩人饒愛之女紅暇教以孝經內則諸書畧能成誦與說古列女賢淑事皆能通其義而於簡肅公遺訓尤孺染誦服乾隆庚午安人年十六余年十五有舊戚葉茂才與何名拔者蕤音銀臺之孫往來兩家先贈公屬爲行媒是歲重九遂締姻焉余家故與孫有連先王父贈吏部東谿公嘗授徒水檻額曰雲

山不礙是也逾年余入學往拜其門此後余家日落力不能具禮壬午秋先贈公售所居天星湖里第余遠遊梁宋間數年歸歸則先贈公偕我母僦居駟馬橋畔兄弟各衣食奔走余無著錐地方議就婚而尚書家訓毋贅女壻同室者難之外姑憐余貧破格允議乙酉二月十三日余入就甥館而安人已三十有一矣安人兄姚基從余叔敬軒孝廉遊不幸夭折弟本壇不克家則取給於十指以自存余婚八日再試

行闕被放歸授館無所晨興徒步入重闥抵暮空腹以返安人輒相慰勉幸是夏錢文敏師特拔食餼漸有生理明

年安人孿生二子長聯芳次合璧無資得乳媼芳兒以五
十四日殤次遂改名傳璧丁亥余辱知於同里錢文端公
暨公子少寇師延館其家戊子長女雲錦生庚寅次女萱
壽生余西溪橋婦舍六年舍前後各半弓前列紡車書幌
夜俟衆雛爛漫安人手箴管箒燈佐讀至漏殘吾伊不輟
膏不繼則暗中捫之後半雜置庖湑之具爨汲躬親舍旁
栽桑數本溷圃必除安人踈裳傲裯處之若素間治具攀
先贈公杖履來過視其子女顧以不得娛侍我母久鬱於
胸至是余積廩脩所入又文端父子相飲買斜橋老屋數
椽纔蔽風雨迎兩老人暨兄嫂入城同爨安人始拜太宜

人於新居吾母顧而宜之嫂亦孫姓安人以姊呼之迄歿
雍睦無間言辛卯閏中余遭痢晝夜數十次顧飲噉自若
八月下旬侍文端父子祝

釐北上安人爲余治行刀尺聲與藥鑊相間然不作離別
可憐色改歲姚太孺人來就養迨余南還痢亦隨愈見安
人仰事俯畜內外井井余喜謂曰健婦夫半此言不虛耳
是秋安人方妊身會姚太孺人病痞甚劇安人扶持累月
亦疾作於其歿力疾往送歸而寒熱篤醫家誤投二角湯
一昔腹痛胎遽下則男也蓋觸於角也病幾殆自秋徂冬
百計療之乃得甦自是體遂羸不復乳甲午余荷韓城師

舉優行入太學乙未入都丙申余奉先贈公諱奔歸摧毀
餘生終天莫適賴安人克盡哀禮附身附棺弗之有悔八
月朔壁兒復以下痢殤兒年十一畢六經能背覆周禮正
文不訛脫一字安人哭之拊心口已矣奪吾書種胡遽耶
荷韓城師賤番慰唁兼助麥舟爲先贈公營窆丁酉秋師
再視學任滿拉余北行戊戌余由肄業生考充正紅旗教
習庚子屆我母八十慶辰請假暫歸恭逢

聖主五巡浙水迎

鑾奏頌

召試一等蒙

恩特賜舉人授官中書舍人時八九兩弟已授室安人率
介婦稱觴喜溢門內復諏吉於九月既望偕余往致祭於
簡肅公祠以當年不得已爲倩贅非公訓故也餽餘以會
其宗人十月杪爲余辦裝忽愀然語余曰君今得官恐我
不久相莊耳蓋少時日者云然余強慰解之而別余趨走
禁掖充各館校修入有書出無車清俸無多仍藉賣文餬
頰歲寄百二十金爲我母膳脩之奉安人先意承志務得
堂上歡心定省外日必三次入廚洗手爲羹臠滫瀡脂膏
必適口而後卽安中裙廁踰身自洗滌以爲常遇歲時家
祭几筵敬享必極豐燭甲辰余再下第再以寧母假旋至

丙午三月還京安人聞歲侵多掠余以單車走東道廢寢食者旬時驚憂成疾咯血不止後接余抵京信始瘥丁未余成進士蒙

恩擢授吏部稽勳司主事入署見孝治堂額詢諸吏則百官終養其所掌余笑曰請自隗始第人子何忍言終稱侍養可也三日謁告歸先是丁酉維夏余兄弟奉母賃廡於錢文端西第者十有二年余既將母循陔而未有寧宇戊申夏五余授經臬署方伯晚霞歸公倡余年舊諸君分贈草堂資爲余買白駒巷第宅在兩帶湖間余增築養堂三楹曰帶湖書堂安人相余拮据心力俱憊頻年以來安人

弟妹俱物故骨肉凋零存者幾不能自立顧影長嗟於邑
誰語用是舊病時發時止大露蚤衰狀而勉強撐拄日形
憔悴庚戌午節余亦患瘧安人視湯藥者兩閱月九月五
日爲我母介九十壽萊綵臚歡族姻咸集禮成而安人不
復能強起矣初病肝繼成瘰癧參朮罔効臥蓐八閱月彌留
時惟以不獲終事太宜人爲憾嗚呼慟哉曩余爲兩弟覓
偶及遣嫁最幼妹悉節縮脯脩安人力贊成之歸王氏妹
與妹婿相繼早世遺孤甥二年並垂髫余撫之遂長各從
師受業凡一衣一縷一襪一綦胥山安人手製補紉澣濯
無異己生余諸生時不問生產好購書好款客好緩急人

安人拆花釧質釵珥佐之不少吝余性偏偕好詼笑好燕
譁好作綺語好直而不能容人過安人輒因事規勸得佩
韋之益爲多殆無忝閨中良友云素彊記內大父學博公
晚年日錄數十冊安人少曾寓目能舉其辭舊事尚歷歷
言之不爽時日每啜茗夜話以破岑寂好十七家相術客
至則請觀狐趙以驗其言余嘗曰子欲倣菰城鄭姬及史
中暉母耶爲廣置許負茅通之書斯夕披繡不去手憶余
在京日劉青坦少空語余曰君眼角有魚尾紋莊岳其不
免乎余心嫉其言而安人曾未之及豈觀人則明耶抑知
而故譁之耶安人習勞勩久而自忘其瘁旣爲家婦未析

箸身執庖爨者逾紀余官中書六年始買一婢操作如故
逮下尤慈仁先爲余納遣王十餘年無出復爲余納遣符
並甘苦與共衣食等兩女迄今余女遵母教侍大母寢處
番宿更休兩遣亦手調烹飪如安人在時卽安人可知矣
嗚呼余與安人並起自衰門荼苦備嘗生艱至極從無一
瓦一壠以至於有一壠一區豈不大難顧余五十成名竊
喜老母九旬期頤可必所與共忠養者我絳子佩繫安人
是賴白傅所吟嫁晚孝於姑者信已今安人中道舍余我
母老福未有艾余則御食如初而旨甘柔滑二十年佐餽
之人不可復得集於枯不集於苑抑元微之所謂百事哀

者非歟能不悲哉安人歿以乾隆五十六年辛亥四月初六日戌時距生雍正十三年乙卯五月十三日丑時得年五十有七

勅封孺人晉封安人子二惟欽卽傳璧殤惟鉢卽承綸側室符出幼未聘女二長字琬署定海縣學訓導陸李村公子戊申

恩科舉人名開榮次字候選訓導

恩貢生范治堂公子名之戊俱未行

頤絲堂文集卷十五終

頤綵堂文集卷十六

秀水 沈叔埏 埴爲

祭文

公祭大學士于文襄公文

代

嗚呼台宿沉芒文星掩曜嶽隕維翰川摧濟權秉國之鈞
爲臣之鵠

叶

天敎胡速廓寥誰蹈

黼展咨嗟門牆驚悞櫪馬悲鳴達鴻孤叶公起廷魁門才
惟肖接武詞林善承家學

叶

丹穴聲清玉堂名噪振采瀛

洲徊翔蓬嶠游貳列卿羣占遠到嚮用駸駸任密望高

叶

夙夜

直廬出納典誥遂掌絲綸黼黻締繡叶晉秩三公青宮太保叶往者金川治威征譟蠡午軍書旻旦獨召參贊密勿氛祲迅掃颺拜臯夔頡頏方召實運幄籌永清蠻徼帝嘉遠猷俾同酬犒世職賞延

天詞褒勞紫閣圖形黃扉寫貌稠疊便蕃

眷深恩浩鶯黃賜褂孔翠飾帽綠野平泉切近雲霄叶

天上分甘禁中策蹕麟趾振振宿學是敷鳳羽翩翩首揆是教五典汝敷度支盈耗六籍汝綜藝畧紬校公昔慶辰甲週大撓額

賜耆英驪珠朗照預祝添籌川示

恩好

新宮落成公善頌禱更閱廿年臣齒已耄願陪

燕閒長侍

東朝

叶

帝鑒公誠家人語笑公質秀羸忘劬感激

叶

嗽上爲常直

無虛僦力疾晨趨未嘗請告昨再感寒喘行蹢躅給假暫
歸休閒稍稍存問臣寮相望於道大藥隨頒太醫就療參
朮無功俞跗鮮效第正歸終室聞辟標奠醑增榮襍衮有
耀

親灑宸章製詩以弔比於世南丕揚徽勛公之執政除苛

解饒大體能持佐成選燾公之取士英髦登造開閣招延
虛懷傾倒公之經綸從容廊廟溫樹不言謀謨幼眇公之
文章炳蔚虎豹賡歌矢音徵角同訓公坐中書渙汗大號
出則簪毫冠隨左纛一德上孚如瑞合珎生銘太常旼功
以報歿祀大烝司勳是詔典備飾終禮隆寵悼叶某等叨
陪樞禁並管機要當軸指塗南車先導奉以周旋庶無失
譙元老云亡將誰則倣追念平生感增戀嫺漬酒陳辭歌
些以招叶

祭方恪敏公文

代

嗚呼四嶽領輦轂之喉舌分陝寄甸封之屏藩展壯猷于

毗倚兮曾不享夫大年海內想其風采兮失良翰之旬宣
矧予託葭莩兮故嘗奉賢者以周旋惟公才最通敏兮允
濟之以慎勤金在鎔而百鍊兮羌夙遭乎迪邁少小去鄉
井兮侍荷戈之晨昏薪馬通而餌漣乳兮獨重繭於塞垣
曰孝友其性成兮又雅慕侯嬴季布之爲人豪傑自古多
奇遇兮際

清時之無遺賢以布衣預薦達兮邀破格之渥恩授綸扉
之壓角兮佐平邸以叅軍磨盾鼻而草檄兮馳倚馬之千
言值準夷之効順兮飛捷書於甘泉由銓曹而膺方任兮
屈飲至而策勳得老成之負幹局兮愿中外而三遷撫吾

浙而不忘旅貧兮賑婺州之旱殍旣宏總平上流兮表百
郡之率先余方守官侍從兮隨豹尾之清塵念詞臣無外
交兮過上谷而駢駢公詣余講世契兮出箋札之紛紜見
執友而竊喜兮豈過庭而未聞慕縞紵之高義兮猥投分
於鄴門洎余尹京而作翊兮相勗繼趙張與邊延挹和衷
之商摧兮勝十部從事之差肩當尺蠖之穿坭兮紺幡飛
滿於河塹趣菱捷以雲集兮障巨浸之稽天築宣防而湛
玉兮靡水衡之萬緡約需頭之入告兮荷鳳諾於

堯仁甦三輔之雁戶兮膏黍苗而化洽行春聽輿歌之載
路兮奚余力之有焉施喬松之蔦蘿兮復眷之以嘉姻曰

郎官宰吾禾之輔縣兮芘棠陰於二難余旣請急而循陔
兮唁杞梓之凋殘傷仁風於便面兮辱存問之勤拳晤屋
梁之明月兮遙緘憶於文安媿詩筒之響答兮行且攝揆
席於覽揆之辰來泝江之惡耗兮亦旣哭之於廟門遺生
芻之迢遞感宿草之芊綿假楚些以敘平生兮庶幾鑒濡
毫而涕漣

祭熊滌齋太史文

代

嗚呼峯頽五老兮松摧攝山昔西江之耆舊今白下之華
顛馬策一扣兮楚些哀纏使封疆失芘於靈樁兮翰苑企
三朝之木天惟公鍾廬阜之奇秀兮一日千里如騖襲厯

塊而絕塵掇巍科而易於拾芥兮蓋自垂髫舞勺而文譽
翩翩振冠簪之寶冑兮鯉庭方聽履於星辰蓀獨不恃夫
門閥兮儼得第而爭先迨蘭成之射策兮已橐筆於柯亭
劉井之間每入朝而步月兮前輩望之而目以神仙昔崔
湜之酬杜麟臺兮燕公聞而興歎洵文與位其可致兮抑
不可及者其年當孝感之人相兮見小阮而汲引偏殷譬
草木之有臭味兮况家牒之相敦儆文穆之故事兮亦云
內舉而不避親庸詎知忌者之竄名兮事同黎邱之眩人
甘心蹈一眚而不自白兮竟忍誦於覆盆高材自古多折
挫兮際寶門之無遺賢羌再起而再蹶兮曾不改乎雅操

之能堅公既早達而屢躋兮詰嗣亦選羽於清班偶因公
而望吏議兮又鯢息乎溟淵值

聖主之初巡南國兮叨前被之渥恩暨令子同拜復官兮
更一歲而幾遷得福星之耀吾浙兮人謂與吳山越水有
因緣便安車之迎養兮來鶴髮之翩翩過子舍而僅隔一
江兮停天末之片雲艷瓊林之再入兮合先後甲而闕宴
添春成詞場之佳話兮繼溧陽北平而與之差肩無何鼓
莊缶於繼儷兮開府去浙汜而言旋顧眷深而不聽其終
制兮緇軒甫脫輶於江堧望麾幢之重蒞兮部下莫不戴
召而思郇荷

九重之俯鑒兮奪之黜聖苴杖而輿望愜然古今所侈爲
殊遇兮被墨纁而敷厯於戎旃憶家君之獲交於總角兮
共文酒於都門摘領髭而科名有遲早兮走馬觀蕊榜之
名傳念賤子之謏劣兮偕文孫雲路而同騫聽耆成之緒
論兮猥款接之殷勤篤孔李之世舊兮忘年輩而申以嘉
姻謂期頤其可待兮奚旗鶴之倏焉遺冢子而走唁陳絮
酒之一尊

公祭內閣侍讀學士雷快亭先生文

代

嗚呼吾蜀貴經術而重氏族兮有三代漢唐之遺風若隆
州之起伏盤礴兮鍾英靈秀粹之氣而多生異人惟公毓

名家而望系馮翊兮幼克稟過庭之藝訓叶衍次宗之學
脉兮興儒業於一門昂季以明經鵠起兮羨俊髦接迹於
差肩越六載而繼登拔萃兮時名噪競爽之二難鄉指鳳
麟之雙峙兮比青陽氏擅科第於執笏之山既起家宰平
遙兮懋循聲之藹然屈報最而游膺州牧兮維時伯氏亦
筮仕於畿輔之間值

翠華之來巡臺麓兮俱執事於除道而清塵觀

行闕而並邀

宸注兮儼

屏展之書名

叶

伯牧磁而公守常德兮良吏受

主知而始被渥恩擢長沙之首郡兮治行藉藉於楚南邇
太夫人之逮養兮迎板輿而往復者汾晉與媯燕觀旂麾
之迤邐兮博堂上之歡顏泊伯氏守宣化而溘逝兮嗟雁
影之漸單公體親心之思士兮乞終養而言旋迨大吏以
情入告兮調漢中而被

眷方殷俾就近而遂其將母兮望雲棧而不隔川蠻際西
陲之軍興旁午兮籌飛輓而肯憚辛勤遂迭登乎剡牘兮
遷監司於漢興厯濟東而激揚尤著兮黜所薦之吏而率
屬以無浚民

命督儲於浙水兮秉楚臬而嚮用頻頻遘私艱而扶歸脫

輔兮服旋竟而臬事重陳自山左而之山右兮按部問棠
陰而瞻帷憩焉紀循績而口碑在望兮聆謠謠而竹馬駢
闐無何以條奏呈吏議兮邀

異數而京秩俄遷公之治獄多平反兮得令予早邁乎詞
垣許追隨於官廨兮荷

聖主鑒誼方之勤拳及垂老而翔於綸闈兮有從孫以清
華繼起而聯翩謂公宜享耄耄而有餘慶兮胡懸車井里
而僅止五年憶青門之祖席兮接履綯而訝似神仙述盛
德而徵諸惇史兮感典型之猶存聚邸舍而哭三峒之耆
舊兮相與酌卮酒之一尊拜斧堂而尚須他日兮公之來

陸龜蒙文集卷之六
兮馨以斯文

公祭王母吳太夫人文

代

嗚呼誕名公卿是子是母祿養榮封康強壽考胡不期頤
遽摧萱草令子呼搶同人黯沮惟太夫人延陵女士幼習
禮儀蚤歸良偶善事尊章躬操井臼堂上愛憐閨中勞苦
先公能賢一經是寶不卑抱關教子之故羣從八人相隨
廨宇暨於同寮子弟來者靡有戚疎各以齒序賢母佐之
恩勤噢咻浣濯縫紉飲食寢處一視忘劬護之而煦用勗
研覃俾無些窳甫見呈材俄悲失怙轉慈爲威母也而父
食報匪遙如攜如取旣魁大廷後彼康呂旋枋文衡先自

荆楚母曰子前我今告汝孝重安親無違我語無怨於人
無欺於

主汝有兩舅我甘哈糗就養何常能行與否子跪承教母
乃領許二十年來板輿萊舞跋涉皇華迴翔

禁籞視學東南閩疆浙土洎領身冠纔離天姥奉母春明
承恩

帝所扁錫蘭陔筵開菊醕共介大年言集簪組迹母生平
與物無忤用遂頤和以享福嘏仕則封珪學惟斷杼守以
終身無往不可某等知交佩服已久慮毀唁存情殷舊兩
束芻用陳肴核惟旅紀嬾管形忘其醜縷

同館公祭高母趙太夫人文

代

嗚呼吟動莊盆戲停萊絲難老椿年易凋萱藹矧仰師模
咸推母儀叶楚些增歆同聲而歎惟太夫人秀鍾天水女
誠夙嫺婦德俱有叶繼室高閨拖青襲紫克佐蘋蘩靡愆
蘭茝上事尊章弗之有悔下適戚疎諸姑娣姒繫袞相夫
衣帽課子課子云何善持大體不假笑顰不苟步跬則以
遠到功必求倍嚮學孜孜尺璧寸晷范帳韓檠枕經胙史
用襄義方家政就理子名既成主績是倚看選亭衢旋躋
鴈仕榮遂顯揚慶詒福履燕譽龍光式彰濟美玉尺水衡
惟

天子使簡佐寅清副茲台揆邇厥由來趨庭詩禮庭訓無
忘一秉母氏教澤旁流育我多士移席玉堂去天尺咫羣
經紛綸後進模楷師教無窮首敦倫紀問述賢明郝鍾堪
比吾師孝養左右奉事叶晨葩侔鮮蘭陔言采曰視承歡
齊眉耄齒而胡計聞婺輝掩彩走唁倚廬纏哀陟屺夢釜
在堂鄰靡盈七我廢受詩薤歌當誅靈鑒來歆師無過毀

祭蕭侍御

際韶

母趙太恭人文

代

嗚呼萊服板輿乘輅奉使昔人所榮祿養其逮矧曰禮宗
南國是歧胡不期頤樹摧堂背惟太恭人天水之裔內則
夙嫻女箴早肄嬪於高閼壺德咸備尸敬季蘭相莊稚紉

用式縉紳克昌賢嗣門聚三鵠一鳴丹穴叶挺生吾師主

璋重器幃幔親承衣帽嚴蒞造翼蜚英摘髭取第鈴院玉
堂斑毫是珥蘭署柏臺霜簡是昇教秉義方訓推慈懿賢
母實難其來有自乃心盡傷庭椿先悴泊焉世榮尤徵胸
次勗以儉勤毋忘早歲寡鵠之悲無時少置昨奉

渥恩弭節近畿

叶

捧杖將車承顏養志文葆充閭芝蘭繞

砌烟水路沙江鄉無異丸膽含節春生官廨舟楫駢闐孫
曾羅拜清宦多年少謀甘臙朱戟來章白華無媿爭羨我
師娛親願慰庶幾耄齡康強融洩噩訃奚遄遽捐埃壘某
等幸列門牆辱收菅蒯仰受師恩邇惟慈誨予舍來過孫

枝並侍耳熟宣文管彤繼美叶歐母云亡永懷荻畫一舍
而馳走唁以邁勸無過毀邦家胥賴申以質言侑茲奠醑

同鄉公祭邵母袁太孺人文代

嗚呼數女宗於左浙兮推故家而風範猶存慨婺輝之掩
采兮忍對玉樹而相與泣凋謝於金萱惟太孺人之蘊粹
於瑤閤兮陸學溯慈湖之袁歸於邵而近在姚江兮江似
篆而山丹旣性成夫婉嫕兮乃內則之夙嫻循南陔而佐
養兮調羞膳於晨昏相夫子而庭闈雍睦兮荃獨善承夫
舅姑之歡舅故吾鄉之耆舊兮疇昔齊名而競爽者儼玉
友與金昆來朋簪而戶外屨滿兮爭問奇於子雲已挈子

而赴枝官兮久秉鐸於蛟門委家牀而責諸健婦兮倚隻
手爲之經理而內外井井者一絲不勞適膳服於戚疎兮
治簠簋而娛賓用措持夫門閭兮更濟之以儉勤舅既歸
而尤勤洗腆兮畢頤養於修齡襄大事而悉申禮法兮必
誠必信而弗之悔焉泊鴻案之相莊兮每篝燈佐讀於宵
分績學往往困名場兮曾不少芥於戚欣繫蘭筋之蹠足
千里兮殫教子之苦辛長摧折而蚤世兮昂仲季以騰騫
仲果掇巍科而冠南宮兮文譽遂滿於東南叶雖姓名之
上注兮仍垂翅而言旋母曰爾盍更學彼鵬息兮豹暫隱
而澤霧於南山夫孰知秘圖之藏石匱兮發光氣於山川

同宛委之有赤碧珪兮終貢之爲玉堂之珍忽赴隴而來
鶴版兮銜

詔命於丹宸還鳳池之故物兮看回翔於木天鄉閭莫不
嘖嘖其稱願兮母則曰豈以易我荆布之風叶却綺紈而
弗御兮安儒素而相忘於令子之在詞垣念吾黨之得益
友兮古稱行秘書者庶幾屬之斯人偕儺校於石渠藜閣
之上兮叨切劘於劉井柯亭之間方共祝難老於令壽兮
詎凶問之驚聞聚桑梓而唁邸舍兮輟歌春而古誼必敦
生芻一束兮有酒盈樽謂仲無毀兮以慰九原

同鄉公祭祝母沈太孺人文

嗚呼數海昌之著姓兮曰女宗亦蔚其賢明挺玉樹而亭
亭特立兮忍使佇南雲而忽焉泣凋謝於金萱惟太孺人
之蘊粹於瑤胃兮名閥冠浙右而望系吳興女於祝而歲
未及笄兮恰泥金與婚帖俱傳時則夫婿宴紅綾而歸娶
兮人莫不豔花燭於長安乃故家祇視爲恒事兮顧獨喜
新婦之能賢洵婉孌之性成兮得尊章之甚歡佐循陔於
簪下兮滑湍瀧而薨董萱相夫子而牽絲冷宦兮振文鐸
於析津旣跋紅校藝施絳列生徒兮嘖嘖頌內助之得人
御板輿而迎大母兮率鸞雛柔色而問煥寒邁威姑之大
故兮盡哀禮而弗之悔焉泊明府一行綰銅墨兮趣正馬

之官於大名願畱侍夫君舅兮俾無貽內顧之患亡何以
新昌被誑誤兮堂上亦得告而歸田倒宦橐而曾無長物
兮雖有無阻勉而弗歎於甘鮮舅繼沒而獨播送往兮會
良人需次於都門治棺衣而務求密緻兮尤所難者斂手
足之必以湖綿婦代子而更無遺憾兮慕仇湛而又教子
之克勤起一經而功研韋幔兮裊然首畿士而冠一軍名
甫上賢書而遽嗟孤露兮萬里來訃音於粵西叶哭壞牆
仆絕而復蘇兮從此與藥裹爲因緣昂獨子以南宮之接
武兮謂九京望子以拳拳念先人浮湛於吏局兮抑可爲
而不可爲者初不係被褐而負薪思繩素業而光先緒兮

庶奮迹於木天倘相依而遂吾微尚兮豈復厭京秩之長
貧歎才俊之多阨運兮科名每靳其聯翩例避嫌於疏屬
兮致公車再阻於春官追獻賦於

行闕兮昇壓角而出自

殊恩預紅梨之校錄兮紉二酉之遺編行次第石渠與藜
閣兮儲禁橐而遴筭班慰倚閭而差強人意兮固吾鄙所
拭目而懸懸相與視北堂之難老兮胡凶問之遽遄某等
忝維桑之投分兮况升堂之誼敦或同硯席共車笠兮資
攻錯於他山紛駢闕而走唁兮大半日邊遊子而孰能禁
涕泗之汎瀾述母德而有待兮遲襁章愍飾以表其阡攜

絮酒過僧寮丁寧無過毀兮陳質言雜楚些愧彤史之不
文

公祭周母方太夫人文

嗚呼唐柳公綽最名有家法兮配韓岡宜陽之曾孫逮仲
郢而一遵其教兮畱楷範於摺紳宋陳省華尤善教子兮
三堯蔚鼎盛於科名乃馮夫人實贊成之兮殿中傳佳話
于樓煩緊太夫人之蘊粹於高閣兮僑昆陵而貫大興溯
黟侯之裔胄兮爲文端相國之後昆影華纓而世推甲第
兮考獨振文鐸而襲寒氊幼明詩而說禮兮性婉孌而女
誠是姻值吾師之初賦悼亡兮方鰥處於木天遂委禽而

爲繼儷兮相莊舉案而敬則如賓佐玉堂之冷宦兮甘淡
泊而不厭清貧會君舅之來自巴郡兮奉色養於晨昏親
耶舍之操作兮喜新婦之能賢泊奉諱而偕返於涪兮事
戚姑而尤善承歡師服竟而仍官京輦兮畱過侍夫庭萱
遭尊章之繼沒兮襄大事而弗之悔焉憶吾師之荷
殊恩兮輕萬里奉使於中山越重洋而抵蓬島兮持龍節
而被服麒麟時則倚內助之持家糠粃俾遐陬于役無內
顧之慙迨還

朝而駸駸嚮用兮待冰衡朗照於東南自豫章而旋移浙
學兮碧幢絳騶與衝牙搖翟共輝映於山川廣似續而爲

之置適兮上法乎葛藟膠木之推恩尤所難者撫諸郎而
同於已出兮喜瓊枝之繞膝而稱其爲瑜珥瑤環吾浙戴
師恩之浹於育士兮竊又仰課子之真勤噪二難之競爽
兮儼詞林鵲起而聯翩微衣帽之督涖兮曷由見巍科接
武而差肩顧主績猶策勵其職業兮同館傳母訓之諄諄
昨吾師之銜

命諭蜀兮曰改歲而歸自里門話故鄉之風景兮相與慰
擁傳之征人慶齊眉之壽考兮亡何遽嗽上而旋致手足
之不仁竟俞跗之莫效兮庸詎知痼疾之沈綿某等忝屏
牆之環侍兮共子舍之周旋熟壺範之兼鍾郝兮徵芳徽

於簡編驚相春之聲斷兮愴裴几之門生脫萊衣而爭唁
桐杖兮扣莊缶而更祝椿齡漬絮酒而冀同臯復兮濡管
彤而陳茲賢言

公祭徐母袁太安人文

嗚呼數高閼於江介兮推世族於京口之袁媿郝鍾之禮
法兮矧女士之能賢述衣幘之母教兮胡彼蒼獨靳以脩
齡叶歲機終於蓂莢兮迺嚴冬凋落夫金萱惟太安人之
性成婉孌兮允毓粹於清芬厥考負爽鳩之碩望兮歸南
州而尤稱夫嘉姻信光益夫家道兮徵鳳繇之吉先中珩
璜琚瑀之節兮獻棗栗而受以茝蘭猗慶閭之代生驥子

兮正膠庠譽噪於勝冠儼篝燈之佐讀兮期造翼於鵷鸞
以任卹爲戒旦兮勗古處於三物之宜敦方瑟琴之靜好
兮未浹歲而遽隕所天哭壞牆而僞踊兮聲殷殷而田田
願相從於泉路兮甘殉節而捐生叶惟時君舅遠在京邸
兮馳家問而唁存爲敦勉以大義兮輕

輦路之三千歌黃鵠而強之視息兮從此祇霜雪於松筠
緬先公之績學兮校

天祿而遲被

恩綸瀕西河而桓嫠幸在今代子職而視膳承顏洎讎書
之告蒞兮榮畫省之遷官得孝婦之朔南隨侍兮返清溪

而終以天年畱牙籤之萬卷兮充屋栢而觸手猶新際藐
諸之甫遊泮水兮紛家事之述邇禦外侮而不遑啓處兮
荃獨濟之以艱辛指丹鉛之手澤兮謂葆此簪笏之家珍
比一經之長孺兮同垂幔之宣文亦且土苴夫金帛兮羌
獨重夫遺編守世書而罔失兮儼儲藏之葉陳就藜光而
借讀兮胥沾丐夫流傳嗟煢煢之母子兮慙播越而三遷
僑吾禾而始有寧宇兮築金陀之數椽檢繡裳與緇袍兮
樂家室之初完求烏回之吉壤兮趣筮宅以營窀喜蘭陔
之世孝兮業含飴而弄孫昔藁砧之訣去兮積呼搶而痛
痹不仁成四肢之痼痼兮偃牀蓐而終身雖參苓之罔缺

兮猶痼疾之沈綿夫何婺星之掩彩兮倏棄養而溘焉
等俱紀羣之世好兮重之以孔李之通門耳芳型而增輝
彤史兮行且垂楷範於縉紳漬絮酒而侑之芻束兮協楚
些而綴以質言睇封禺而緇謳遙和兮冀少駐夫雲輶

祭姨母石太君文

嗚呼溯舅氏之云逝兮曾不越乎十年謂淳德之多上壽
兮惟建慶之一門屆大耋而康強善飯兮繫我姨之僅存
庶期頤之可卜兮胡遽疾三日而莫起夫沈綿惟姨母之
蘊粹於名族兮皮市萬石爲吳趨所著聞幼婉嫵而長尤
淑慎兮嬪白洋之朱而女誠克循相夫子而躬操井臼兮

允善事乎尊章叶督耕織而勉紹世疇兮旣佐之以儉勤
乃旁及乎族屬兮適膳服於戚婣勗雞鳴而相莊舉案兮
鄉曲稱古處之獨敦教獨子而不存姑息兮殫鞠育之常
辛昔先君之相攸惟謹兮遂嘉姻之重申幸吾姊之得所
歸兮學於姑而母教是遵吾兩家之還往數密兮幾無間
乎朝昏奉杖履而侍槃匱兮譬朱陳洽比於一村泊寒舍
之中落兮去星湖而播遷通鹽鼓而有無黽勉兮感德意
之勤拳娛歌鵠而彌勞家棟兮嗟藐諸亦失蔭於靈椿視
諸甥而誼逾猶子兮尤勗勵之維殷歲約北堂而常聚兮
相與諧言笑於華顛迨甥輩之稍奮

皇路兮庶慰藉之頻頻昨我母之壽躋八秩兮治一卮而
屢迓夫巾軒姊歸祝嘏而姨獨措門戶兮羌旣耄而不懈
夫神明叶詎轉瞬之纔及浹月兮竟二豎之遽纏夫何問
疾而詣牀下兮猶獲奉乎話言胡一昔之奄忽兮驚凶問
之來遄惟沒寧而存順兮已身享夫遐齡叶所禱祠而缺
望者在含飴而弄孫緬世德之必有後兮雖遲久而可信
諸天固報施之不爽兮亦比閨稱道之同然叶等赴總帷
而哭唁憶疇曩之周旋絜絜酒而陳奠鑒質言而無文

祭席母蔣恭人文

嗚呼余獲交農部而還往於薛澱之瀕者二十年矣荷農

部高誼卽稔知恭人之賢明而孰意其甫浹歲而有繼逝之歎也憶丙戌夏五農部館余於綠水之園距里第僅數武時冢嗣孝廉年甫羈卯每投經多暇對芙蓉之出水映千頃之淪漣余固喜斯園之清曠而因以淨植爲之顏蓋其地爲吾郡陸清獻講授之所農部先人畱請業之數椽區區嚮往之意猥欲以當湖芳躅比於濂溪遺澤而私幸後生小子之得躡其後塵改歲余再館於此則更申愛蓮之說而作記一篇夫園林特雪鴻之寄迹然使余感主賓之款款與師弟之惓惓者皆恭人之賢有以贊成其間者也恭人出自海虞賢輔之族服習詩禮名教步趨中珩璜

玊瑀之節一切不具述所難者事其尊章運副公暨顧太
恭人先意承志務委曲而得其歡農部家世好解推施子
斥有餘以恤其戚黨鄉鄰恭人相之未嘗有德色於人至
送往大事必誠必信弗之有悔焉視諸遴如姊撫其所出
子女鴈鳩之愛必均其教孝廉也衣帽督課無絲毫姑息
惟是親師取友俾光世緒以善其繼承既婁薦鄉闈俛得
而失遂趣之入都諸大老咸器重刮目尋

奏充

文滙閣等處全書總校衰然冠二十一員恭人雖喜令子
之簪翼亨衢而家問勤拳勉之報稱又視同固然也曩余

於客授後嘗一登介壽之筵庚子秋復來預執紼之會中間或間歲一至或挈弟來前路祇三舍數用相存曹溪弭楫會幾何時而昨歲哭農部公今又哭恭人豈賢琴瑟偕老之誓有素而同穴之願必償如此其殷故不旋踵而胥赴重泉也耶獨孝廉纔爲無父之人旋罹失恃之慘銜恤靡至又何以慰鮮民之生哉余忝通家之雅慮孝廉過毀不憚走唁之頻頻生芻絮酒庶鑒余不斐之言

哭莫文學四兄崑桂公文

嗚呼悲莫悲於飢驅而客死兮驚訃音之遠聞在他人而搯挽雪涕兮矧其爲同懷之友曷憶與兄別於辛卯之秋

分予方抱痼北上而九弟臥疴於牀茵屬兄遲其起而偕以入豫兮庶無慮道里之間關予瀕行衷一金以手奉兮曰聊飲衣裳之補紉迨予入都而旋出兮仍力疾陪侍夫蒲輪除夕和詩而見志兮所不能暫釋者天涯舅弟未出慰堂上之老親過錫嶺而至汶上兮接豫中之鴻鱗弟書勸予紆道一往兮敘樂事於天倫予欲來而輒被肘兮歎行住不能以自專旣予抵禾而瞻依獲遂兮季又辭予遠躡乎嶺雲兄畱豫而依然授讀兮九弟乃自京而言旋未彌月而別去兮正落花飛滿乎江津昂弟其善視兄起居兮話款款於船唇予去冬忽得噩夢兮若有告予曰爾兄

病革於河南叶泊得兄書而體已平復兮訝前半之信然
詎意合兩載而妖夢終踐兮使我欲竄宜憊而無緣計予
與兄之契濶兮祇三易乎冬春顧那秋哭妹而今夏哭兄
兮豈龍蛇偏厄於我躬叶人生有幾多眼泪兮兩次傷同
氣與同根予家合女兄弟而適符成數兮迄辛卯而存者
七人今又去其一分雁行中斷矣而倍惜離羣予與兄託
手足兮蓋三十八年五兄暨予年相若兮兄則長予四齡
幼嬉戲覓梨栗兮每繞紉而羞肩居同席而連業兮山步
趨之後先就外傳於里塾兮共俎豆一先生叶嗟五兄之
早慧而短折兮望周窆下塲而尚滯城垣遊童子塲而角

兩雄兮猥接武而負時名叶兄資魯而性拘迂兮甘槁項
黃馘於帖誦之一編文章多深沈之思兮復內行之能敦
聘吾嫂而脆促兮遂神傷而不復議昏居恆抑鬱誰語去
與飲徒遊兮解杖頭之百錢間寓情於琴詠兮亦雅慕平
簾頃嘗汗漫一遊邗上兮喪資斧而并褚其衣冠逾四九
而甫遊黌校兮感雙眉而少伸予去婦舍而得寧宇兮邀
並棲於打頭容膝之數椽兄獨依妹而課所出兮妹尋天
而衣食愈艱不獲已而伴弟遠行兮餽頤頰於河埂愁臺
予所舊遊兮讀書西廨宇之三間予曾臧危診於此地兮
禱文昌而竟得生還兄距此不一舍兮何二豎之屢纏及

再病而不起兮却藥物而禱亦難痊恨永遠夫兩老兮遠
齋志於重泉有九弟爲之視含殮兮弗之有悔者附身附
棺謂厚死有以慰生兮藉以報啓迪於蒙訓叶予哭對而
未敢散其帶經兮上有垂白之椿萱匿家問而不忍出兮
所恨非投澗之平安雖禮存乎書策兮節喪紀而丁有經
權泣相向者長兄與伯姊兮歸家對邱嫂小妹而絮語難
陳予妻訝予屏酒肉而獨處兮予寧顧領而不宣進救水
而更謀甘毳兮實強顏而承歡予非忘天顯忍而出此兮
抑恐厖門閭之懸懸待愧歸而設位兮予惟盼說晴於載
輶嗚呼予哭妹之不勝情兮則鞠其二孤視如己子以養

以教而不憚辛勤茲哭兄而永懷疇昔兮將必移殯氏之
槥而卜宅於幽宮叶有次子而卽以置後兮刊遺草與家
牒俱傳畢後死之責如斯而已矣若內除之所不除者則
終悵音容之溘焉嗚呼陰陽道殊兮路又隔以三千魂來
不來兮招以斯文哭諸廟而未可兮就佛刹於金明叶諷
梵唄而從俗兮約伯兄率猶子而敬酌一尊時當終七會
預孟蘭兄其有知鑒予所言

頤綵堂文集卷十六終

勅授承德郎吏部稽勲司主事沈君墓誌銘

兵部侍郎兼都察院右副都御史巡撫浙江等處提督
軍務儀徵阮元撰

吏部主事沈君歿六月其從弟之子庶吉士維鐫以狀來
請銘按狀君諱叔埏字埴爲世爲秀水縣人曾祖某潛德
不耀祖某縣學生善畫供奉 暢春園有孝行父某以君
貴贈兩世皆如君官君生有異秉喜書籍及長屢受知於
學使者列高等然省試輒不遇乾隆三十九年今
予告韓城王相國視學兩浙以優行貢禮部

廷試第一入太學戊戌冬應教習試復第一補充正紅旗

官學教習期年給假歸值

純皇帝南巡召試一等賜舉人授內閣中書充方畧館一
統志通鑑輯覽分校及歷代職官表協修官又充四庫全
書武英殿分校凡八年始以丁未會試中式

殿試三甲授吏部稽勲司主事君居官勤敏諸總裁方引
以自助而君以太夫人年近九十至部曹才三日卽陳情
乞終養歸有終焉之志築室錦帶寶帶兩湖間學者稱爲
雙湖先生其主魏塘講席尤久教人必以法故所成就皆
可觀生平博綜羣書撰述詩古文集共若干卷考錄諸書
凡若干種君以乾隆元年十一月廿六日生嘉慶八年正

月五日卒年六十有八配孫安人無子以弟之子維鏞爲嗣女二君嘗以維鏞爲己子及維鏞貴君曰吾不忍以貴而奪之也遂易今嗣然維鏞視之則猶父也元在京師時卽識君及撫浙又習知君之爲人今君以嘉慶某年某月干支葬於某原乃爲之銘銘曰

公短而腴須髮皓然篤情孝養樂志林泉讀書萬卷著書千篇生平精力盡於書焉吾書此石納諸幽阡嗟公之書世其永傳